

2

LIBRARY  
HARVARD-YENCHING INSTITUTE  
AT HARVARD UNIVERSITY  
OCT 10 1952


T 5409/7920A

白沙集

二

田中

美山堂印





白沙子全集卷之一

奏疏

乞終養疏



臣原籍廣東廣州府新會縣人由本縣儒學生員應正  
統十二年鄉試中式正統十三年會試禮部中副榜告  
入國子監讀書景泰二年會試下第成化二年本監撥  
送吏部文選清吏司歷事成化五年復會試下第告回  
原籍累染虛弱自汗等疾又有老母朝夕侍養不能赴  
部聽選成化十五年以來廣東左布政使彭韶欽差總  
督兩廣軍務兼理巡撫右都御史朱英前後具本薦臣

自沙一全集 卷之一  
一  
堪充任使吏部移文廣東布政司等衙門趣令起程臣  
以舊疾未平母年加老未能輒行府縣官吏承行文書  
日夕催逼不免強起就道而沿途病發隨地問醫扶衰  
補羸僅不大憊於成化十九年三月三十日到京朝見  
赴部乃以久勞道路舊疾復作延至月餘於五月二十  
五日蒙吏部題奉聖旨恁部裏還考試了量擬職事來  
說欽此欽遵臣時方在牀褥聞命愧悚未能就試即令  
姪男陳景星赴通政使司告轉行本部暫令調治再歷  
晦朔心不自安七月十六日扶病赴部聽試而筋力朽  
弱立步艱難自揣虛薄不堪筆硯因續具狀再延旬日

日復一日病勢轉增耳鳴痰壅面黃頭暈視昔所染無  
慮數倍衆目所覩不敢自誣又於八月二十二日得男  
陳景暘書報臣母別臣以來憂念成疾寒熱迭作痰氣  
交攻待臣南歸以日爲歲臣病中得此魂神飛喪仰思  
君命俯念親情展轉鬱結終夜不寐臣之愚迷實不知  
所以自處也臣自幼讀書雖不甚解然於君臣之義知  
之以矣伏惟我國家教育生成之恩陛下甄陶收采不  
遺卑賤之德至深至厚於此而不速就以圖報稱於萬  
一非其情有甚不得已者孰敢騫虛名飾虛讓趨趨進  
卻於日月之下以冒雷霆之威哉臣所以一領鄉書三

試禮部承部檄而就道聞君命而驚心者正以此也緣  
臣父陳琮年二十七而棄養臣母二十四而寡居臣遺  
腹之子也方臣幼時無歲不病至於九歲以乳代哺非  
母之仁臣委於溝壑久矣臣生五十六年臣母七十有  
九視臣之衰如在襁褓天下母子之愛雖一未有如臣  
母憂臣之至念臣之深者也臣於母恩無以爲報而臣  
母以守節應例爲有司所白已蒙聖恩表厥宅里是臣  
以母氏之故荷陛下之深恩厚德又出於尋常萬萬者  
也顧臣母以貧賤早寡俯仰無聊殷憂成疾老而彌劇  
使臣遠客異鄉臣母之憂臣日甚愈憂愈病愈病愈憂

憂病相仍理難長久臣又以病軀憂老母年未暮而氣  
已衰心有爲而力不逮雖欲効分寸於旦夕豈復有所  
措哉臣所以日夜憂憊欲處而未能者又以此也夫內  
無攻心之疾則外不見從事之難上有至仁之君則下  
必多曲成之士惟陛下以大孝化天下以至誠體萬物  
海宇之內無匹夫匹婦不獲其所者則臣之微亦豈敢  
終有所避而不自盡哉伏望聖明察臣初年愿仕之心  
憫臣久病思親不能自己之念乞勅吏部放臣暫歸田  
里日就醫藥奉侍老母以窮餘年俟母養獲終臣病全  
愈仍前赴部以聽侍用則臣母子未死之年皆陛下所

白沙子全集 卷之一  
賜臣感恩益深圖報益切雖死於道路無所復辭矣臣  
干冒天威無任皇恐戰栗之至

謝恩疏

臣於成化十九年八月二十八日具本陳情乞還養母  
兼理舊疾九月初一日欽奉聖旨陳獻章既該巡撫等  
官薦他學行老成可用今懇切求回養母吏部還查聽  
選監生願告回家的例來說欽此及吏部查例覆奏於  
本月初四日欽奉聖旨陳獻章既係巡撫等官薦他今  
自陳有疾乞回終養與做翰林院檢討去親終疾愈仍  
來供職欽此伏念臣本菲才誤蒙薦舉又以老母在念

沉疴在躬未得以仰承試用陛下憫其愚誠不加誅責  
使少寬旦夕之假已云幸矣而又慰之以溫言寵之以  
清秩使遂其欲去而勉其復來此誠天地之量日月之  
明雨露之澤出於尋常條格之外者臣雖至愚亦知銜  
負恩德圖報稱於親終疾愈之日不敢負朝廷待士之  
盛意不敢違臣子効用之初心也但身在牀褥實難動  
履輒欲具本稱謝以不親拜舞益不自安即令姪男陳  
景星具狀鴻臚寺告欲俟筋力稍紓尚當勉強赴闕庶  
幾少伸報謝之萬一而又爲風寒所中肢節沉痛卧不  
能興臣竊復自念舊疾方殷新病復繼恐非旬月可愈

白沙全集 卷之一  
不惟有稽入謝之期，抑且不能亟副歸養之詔。心未酬而罪愈甚矣。臣瞻望朝廷，離違在邇，雖圖報有日，而遲速未占，俯仰愧怍，無任感激戀慕之至。

序

李文溪文集序

成化庚寅九月作

予嘗語李德孚曰：士從事於學，功深力到，華落實存，乃浩然自得，則不知天地之爲大，死生之爲變，而况於富貴貧賤、功利得喪、屈信予奪之間哉！今觀其先世文溪先生遺稿，初涉其流，渺茫汪洋，若江河之奔駛，而又好爲生語，險怪百出，讀者往往驚絕。至或不能以句，以謂文溪直文耳。徐考其實，則見其重內輕外，難進而易退，蹈義如弗及，畏利若懦夫。卓乎有以自立，不以物喜，不以己悲，蓋亦庶幾乎吾所謂浩然而自得者矣。然後置

書以歎曰嗟乎此文溪所以爲文也亟讀而亟思之執卷務盡乃至目倦神疲欠伸欲起輒回顧屑屑焉不忍舍也夫因言以求其心攷跡以觀其用故人之深淺畢見愚不敢自謂有得於文溪之蘊顧平昔所以告德孚者乃區區願學而未能忽焉親諸簡冊之中麤若冥會雖不盡解其說要其歸與此異者蓋寡矣則以之而嗟歎慕悅尚何疑哉傳曰生乎百世之上百世之下聞者莫不興起此之謂也德孚念先緒之落落遺稿僅存復多訛闕乃深自懼恐悉訪諸族之人得舊所刊本與所謄本參校闕其所疑刻之家塾命嗣子昭董其事而俾

予爲序之烏虜自予爲兒時已聞文溪名而喜少長益嚮慕而獨恨未識其心胸氣象爲何如此歲京師獲交德孚亦嘗一閱其世譜今幸寘目於先生之文而知富貴果不足慕貧賤果不足羞功利得喪屈信予奪一切果不足爲累天地之爲大死生之爲變自得者果不可得知而奮乎百世之上興起百世之下孟軻氏果不予誣其所恃者蓋有在也故士必志道然後足以語此德孚好學老當益壯昭也尚亦有激於予之斯言也乎

東曉序

成化庚寅十二月作

居之有名惡乎始君子之居也興於斯息於斯目之所



視心之所隨苟無所事乎畏則怠而入於忘其主於畏乎何氏子隱南海之濱更名潛榜其居曰東曉蓋亦以其識見之超卓能及於微遠如陽氣始舒昭晰無間故以其象諭之云耳時乎見則見矣宜潛而見過也則有畏潛惡乎畏而取於是故直以爲喻已然予謂潛之畏不終無也賜谷始旦萬物畢見而居於蔀屋之下亭午不知也忽然夜半起振衣於四千丈羅浮之岡引盼於扶木之區赤光在海底皎如晝日仰見群星不知其爲夜半此無他有蔽則闇無蔽則明所處之地不同所遇隨以變况人易於蔽者乎耳之蔽聲目之蔽色蔽口鼻

以臭味蔽四肢以安佚一掬之力不勝群蔽則其去禽獸不遠矣於此得不甚恐而畏乎知其蔽而去之人欲日消天理日明羅浮之於扶木也溺於蔽而不勝人欲日熾天理日晦蔀屋之於亭午也二者之機間不容髮在乎思不思畏不畏之間耳潛隱者也理亂黜陟刀鋸非所畏尚亦有畏於斯乎因其乞言序以勗之

送李山人詩序

成化辛卯春永豐人李立武挾風水之術過白沙訪予一日以其術相地於蓬萊館指其上土渦謂予曰仰天湖也予不能識其然否西北歷崑崙之麓出入十二那

環以青山，蒙以白雲。予於是俯仰樂甚。李君既四顧，無所得，復歎仰天湖之勝，以爲竒絕。予於李君，蓋各適其適也。作詩以貽之。

綠圍伍氏族譜序

伍氏系出汴梁。先世有仕宋爲嶺南第十三將，卒於官，遺其二子。新會遂有綠圍之伍。曰朝佐，曰朝愷。今爲綠圍始遷之祖。而氓又始遷之祖所自出。所謂第十三將者是也。氓以上世次莫詳。今斷自可知。以氓爲第一世。自氓而下，或隱或仕，垂三四百年。邑之稱望族曰衣冠之美，無替厥先。術業之隆，有光厥後者，得伍氏焉。吾友

光字自其先大父某始徙居外海之南山山之坡陀有石，延袤丈餘，下可容一榻。光字築爲室，石旁樹松竹，往往造其間，危坐收斂，爲持敬之學。又於白沙築小室三間，命曰尋樂，以爲問業之所。至則商論彌月而後返。用心良苦。時人無有能窺其際者。惟寶安林光與予知之。余交最久，光纔一再見，退謂其弟琰曰：伍光字君子人也。素有肺疾，然喜聞議論之益，當其呻吟疾苦之時，遇有得輒若亡去。辛卯首夏，疾大作，中益以他恙，遂不可支。是秋九月，予往視之，坐甫定，便語云：還我族譜序，吾無憾焉耳。退見其季父絢，洎伯兄裕，咸申之曰：絢等殆

未有請也。惟先生之於雲也，實望之，寧獨愛一言，且使聞之，病亦尋起。嗚呼！若光字者，困而益堅，老而愈壯，危至而知惕，樂矣而不淫，可謂篤信有守者矣。其於伍氏，所謂無替而有光者，其在斯人歟！其在斯人歟！

誄潘季亨詩序

季亨之交於予，十六載，意篤而業不光，一旦棄我而死，不塞望矣。吾所以不能不爲之慟而深追憾於平日也。嗚呼！季亨尚能聞予斯言否？季亨死有子纔五歲，四女皆幼，揭而委之一寡妻，是可哀也。其生以癸丑某月某日，卒於成化庚寅六月某甲子年三十八，屬續之秋，適

林緝熙自寶安來白沙，隨予詩而哀，故亦同作。明年某月某日，葬季亨於某所，其親友馬廣氏請勒諸石爲墓銘。

送羅養明還江右序

永豐羅養明，丁酉春承一峰先生命來白沙。一峰賢者也，而養明其愛弟，與語連日夜，忘倦。昔之善稱人者曰：碧梧翠竹，又曰芝蘭玉樹，若養明其可稱也已。養明喜論詩，予特愛其優柔不迫，近古詩人情態，稍與養明言之。養明日記吾言，手錄拙稿以歸。予亦不能辭也。雖然，君子之所以學者，獨詩云乎哉！一語默一起居，大則人

倫小則日用知至至之知終終之此之謂知其始在於立誠其功在於明善致虛以求靜之一致實以防動之流此學之指南也養明歸質之一峰一峰不予謬也豈非千載之幸歟律詩二章以贈其別不足爲一峰道也

襍詩序

予自成化辛卯秋九月以來絕不作詩值興動輒過之至今年夏四月予病小愈扶杖出門俯仰上下欣慨於心師友代凋知己悠邈殆亦不可爲懷反乎中堂童子絃歌蹶然厥中情危境逼因緣成聲積旬所爲凡得詩若干此外又有聞蛙聞杜鵑示跛奴詰李翁奴送西賓

筆等通若干詩微覺曠日既反於故戒晦日取閱之皆誠意所發辭不虛假序而藏之用示兒子

澹齋先生輓詩序

昔人求哀辭於林希希謝之書有曰君子無苟於人患其非情也夫感而哀之所謂情也情之發而爲辭辭之所不能已者凡以哀爲之也苟無其哀矣則又烏以辭爲哉此之謂不苟於人也余頃居京師二年間從貴公鄉遊入其室見新故卷冊滿案其端皆書謁者之辭就而閱之凡以其親故求輓詩者十恒八九而莫不與也一或拒之則艱然矣懼其艱然而且爲怨也而強與之

白沙先生全集 卷之一  
豈情也哉噫習俗之移人一至於此亦可歎也天下之  
僞其自茲可憂矣澹齋先生姓某氏名某秣坡黎先生  
門人也吾鄉稱先達以文行教後進百餘年間黎秣坡  
一人而已秣坡與予連里第予之生也後不及侍其門  
弱冠與澹齋之子益游始拜澹齋誨予以秣坡事縷縷  
此豈一日忘其師者耶當是時秣坡之門存者不少獨  
澹齋以其學教授於羅山之下子弟有所矜式焉夫不  
背其師於既死而傳其學於來世信也愛其子以及其  
友仁也益之子執饋於我雲也今爲梁氏甥戚也藉是  
三者其死也能無哀乎哀而後爲之詩詩之發率情爲  
之是亦不可苟也已不可僞也已

贈李劉二生還江右詩序

匡廬白鹿之故址自宋考亭朱晦翁一嘗作新之後遂  
無聞焉我朝文教誕敷鄉先輩翟公守南康日始圖創  
復舊觀潮陽李先生繼之白鹿書院之名復聞於天下  
成化十七年江西按察使耻菴陳先生乃謀於提督學  
校憲副鍾公僉事冷菴陳公大叅祁公慨然以作新斯  
文爲已任謂予於考亭之學亦私淑諸人者宜領教事  
乃具書幣告於巡鎮遣二生李士達劉希孟如白沙以  
請同時司藩臬諸賢咸與聞之外則東白張先生廣東

大方伯彭公按察使閔公吉水表德純各以書遺予雲  
 輝日映交迸衡宇二生以諸公之命命予予覽幣而驚  
 置書而走走走且告曰二生莫誤諸公欲興白鹿之教復  
 考亭之舊必求能為考亭之學者夫然後可以稱諸公  
 之任使乃下謀於予是何異借聽於聾求視於盲也予  
 聞之君子之使人也由其誠不强其所不能諸公即居  
 予於廬山予所能也居廬山以奉諸公之教非予所能  
 也二生其審諸於是邑中聞有諸侯之使自邑令佐以  
 下至士庶耆老源源而來靡不觀感李生丰姿秀發言  
 論是非不苟雷同劉生貌恭而言慎確有據守俱稱為

東白門人也予甚愛之留且彌月矣二生以諸公之命  
 以不復辭去予既返諸公幣復為詩別之所以致區區  
 於二生而申景仰於廬山也是日憲副陶公過白沙邑  
 長丁侯鄉諸士友各賦詩以贈帙成俾予序之

送容一之如永豐詩序

縣主丁侯景仰一峰羅先生於既歿乃以學生容貫充  
 弔祭使如永豐而歸其賻於先生之子清極貫云當自  
 永豐東走金陵謁木齋莊先生於江浦然後歸一念懷  
 賢無間存歿可壯也歌以送之歌曰還從江北話江西  
 謁墓人來見木齋長江亦是東湖水何處吟風弄月臺

今朝何事又離群，南北東西一片雲。如此行藏都未定，老夫扶病欲隨君。

### 東圃詩序

南海范規從予游，嘗聞規之父東圃翁，樸茂於人，無怨惡，早歲出入江湖，既倦而歸，圃於西江之許花山之陰，因寄號曰東圃。東圃方十畝，沼其中，架草屋三間，傍植花卉名木，蔬果翁寄傲於茲，或荷丈人蓀，或抱漢陰甕，興至便投竿弄水，擊壤而歌，四時之花，丹者摧白者吐，或飲露而冷，英或尋芳而索笑，科頭箕踞，檉陰竹影之下，徜徉獨酌，目諸孫上樹取果實，嬉戲笑語，以爲適醉。

則曲肱而卧，藉之以綠草，灑之以清風，寤寐所爲，不離乎山雲水月，大抵皆可樂之事也。規別白沙去遊曹溪，洞不相見數年矣，一日復來，與規語，如聞陳子昂、李太白賦感遇詩，一喜一愕，規亦竒矣哉。比歸以東圃詩爲請，且曰：無以娛親故也。予樂聞東圃翁爲人，而憐規之志不可違也。賦排律十韻以贈之。東圃名真字則，未聞也。詩曰：一老胥江卧，瀕江一圃開。林春烟淡泊，地暝月徘徊。盡日扃茆宇，殘年寄酒杯。山蹊人不到，庭竹鳳飛來。靜得邱園樂，清無市井埃。雲封朝几白，風入夜弦哀。細雨攜鉏去，輕筇看藥回。江山吾晚暮，梨栗爾嬰孩。天

上群龍遠花前獨鶴陪誰爲求仲侶心蹟總悠哉

夕惕齋詩集後序

受樸於天弗鑿以人稟和於生弗淫以習故七情之發發而爲詩雖匹夫匹婦胸中自有全經此風雅之淵源也而詩家者流矜竒炫能迷失本真乃至旬鍛月煉以求知於世尚可謂之詩乎晉魏以降古詩變爲近體作者莫盛於唐然已恨其拘聲律工對偶窮年卒歲爲江山草木雲烟魚鳥粉飾文貌蓋亦無補於世焉若李杜者雄峙其間號稱大家然語其至則未也儒先君子類以小技目之然非詩之病也彼用之而小此用之而大

存乎人天道不言四時行百物生焉往而非詩之妙用會而通之一真自如故能樞機造化開闔萬象不離乎人倫日用而見鳶飛魚躍之機若是者可以輔相皇極可以左右六經而教無窮小技云乎哉今之名能詩者如吹竹彈絲敲金擊石調其宮商高者爲霓裳羽衣白雪陽春稱寡和雖非韶護之正亦足動人之聽聞是亦詩也吾敢置不足於人哉少叅任君益吾省間過白沙攜其先公詩集求一言於卷末予故以詩道略陳之若夫先公吟詠之情具在集中覽者當自得云

湯氏族譜序



家之譜國之史也。本始必正，遠邇必明，同異必審，卑而不援，高微而不附，彰不以貴，易親不以文，覆愆良譜也。莫不有家也，小大異焉，莫不有世也，升降異焉，自吾之世推而上之，闕其不可知者，存其可知者，良譜也。世假譜以存者也，譜存之家是名世家，修譜者不知世之重也，援焉以爲重，無實而借之詞，吾不欲觀也。湯氏邑之著姓也，自言先汴人，隨宋南渡，居嶺南，南雄世遠失傳，今以始自南雄，遷古岡，曰統者爲一世祖，統以上無考，譜亡於元季之亂，續之者唐府伴讀八世孫有容也。退菴鄧先生序之，正統己巳之秋，黃賊起南海，一郡騷然。

賊南攻湯氏之婦馬氏，奮謂其夫溥英曰：賊且至矣，他物易得耳，譜，文獻無徵，於是四氏手挈是編，走邑城西北貴竒坑，出入水火，顛沛極矣。譜卒賴以全，湯氏之先以儒起家，世有顯人，序稱伴讀君之賢，有自。今馬氏又賢也，在宋欽州守，馬持國賢而有名，馬氏幾世祖也。其賢益亦有自云，嗣子紹端，念母氏之賢勞，將托以告後之子孫，俾咸念之。徵予序，予惟世家之譜可觀，不援不附，如湯氏亦良譜也。內則賢婦女，外則賢丈夫，相與修緝維持，既亡而復存，湯之子孫念之亦允蹈之。國史記事略與家譜同，史主勸懲，譜勸而不懲，不修其世而

白沙全集 卷之一  
以譜重君子不重也。卒亦不勸而已矣。存世者譜也。存而重之譜乎。世之重以德。譜之重以言。德與言孰重重世乎。重譜乎。在湯氏。

### 關西丁氏族譜序

邑長丁彥誠嘗欲修正其世譜而患文獻之無足徵以問於子告之曰務遠之詳孰信好大之同自誣譜吾所知世其賴之乃取其家舊所藏宗系圖上下亘數百年著而爲世者二十有一朱墨漫滅之餘存者或僅識其行第而已別出近譜一巨編世倍於圖而辭蕪陋亦甚焉。丁氏之居關西者每歲以社日有事於先祖長老主

祭者稱述先世以詔其族之人其所稱顯而遠者丹陽司馬司馬以降曰一司徒六節度十二僕射十光祿云司徒於今無所考圖之世昉於此別譜乃增至其上九世世有顯者焉其他若衆支之所屬世以增損先後抵牾於圖者十九二者之間孰得孰失作譜者要自知之耳。丁氏始遷寧都之園村子孫散居市落與他方者日遠日踈莫能統一各以其派爲譜關西之譜以爲司馬首世而以始遷關西之祖大郎首派遠近詳略大小同異本於圖君一無所改於其舊屬某序之君以成化戊戌進士宰縣一年能使强者畏弱者懷盡毀邑中之淫

白沙子全集 卷之一  
祀而以禮教禁民之邪於茲六年矣然猶未能有得於人則亦以其方衲而圜鑿者有以致之焉今是譜也亦主於實而已予故爲辨而序之予曩讀蘇子瞻剛說想見其人青天白日其立於朝也如千仞之壁可望而不可即者孫先生介夫也於君爲鄉先進君告予以三七年不決之疑曰關西之六世無子後以孫氏是爲七二居士實介夫之子事載居士墓銘今已亡矣蓋其自幼時聞於長老者如此果爾介夫君之所自出豈徒曰鄉之人哉并識於此

奉餞方伯張公詩序

昔魏野送寇忠愍之詩云好去上天辭富貴歸來平地作神仙當是時寇公自永興召入其志方銳於事爲野遽止之故寇公不悅後來通州始書此詩於壁間朝夕諷詠之論者以是善野之言而以寇公之始終爲可議夫君子出處去就之義固未可盡責之寇公輩而山人處士例以不出爲高故其所責望於人亦止以輕富貴爲第一等事則野之於寇公其相與之言如此亦宜方伯張公不以僕愚徃徃欲置之門下近者墨紙責以贈言僕何敢爲佞誠慕古人出處之大不敢徇一己之私主一偏之見以必人之從我而忘天下故區區之辭惟

以已與公進退並言之而不敢效尤於野之必其義可  
否公請自擇胡文定公平生出處未嘗謀於朋友如人  
飲水冷暖自知惟公裁焉其辭曰去夢勞精爽投書阻  
歲年壯遊眇車蓋虛卧老江烟公德清南服帝心簡大  
賢神仙休囑付卿相待回旋

道學傳序

成化乙巳閏四月作

自炎漢迄今文字記錄著述之繁積數百千年於天下  
至於汗牛充棟猶未已也許文正語人曰也須焚書一  
遭此暴秦之迹文正不諱言之果何謂哉廣東左方伯  
陳公取元所修宋史列傳中道學一編鏤板與同志者

共之宋史之行於天下有全書矣公復於此留意焉噫  
我知之矣孔子曰十室之邑必有忠信如丘者焉不如  
丘之好學也後世由聖門以學者衆矣語忠信如聖人  
鮮能之何其與夫子之言異也夫子之學非後世人所  
謂學後之學者記誦而已耳詞章而已耳天之所以與  
我者固懵然莫知也夫何故載籍多而功不專耳目亂  
而知不明宜君子之憂之也是故秦火可罪也君子不  
諱非與秦也蓋有不得已焉夫子沒微言絕更千五百  
年濂洛諸儒繼起得不傳之學於遺經更相講習而傳  
之載於此編者備矣雖與天壤共敝可也抑吾聞之六

經夫子之書也。學者徒誦其言而忘味，六經一糟粕耳。猶未免於玩物喪志。今是編也，采諸儒行事之迹，與其論著之言。學者苟不但求之書，而求之吾心，察於動靜，有無之機，致養其在我者，而勿以聞見亂之，去耳目支離之用，全虛圓不測之神，一開卷盡得之矣。非得之書也，得自我者也。蓋以我而觀書，隨處得益，以書博我，則釋卷而茫然，此野人所欲獻於公，與四方同志者之芹曝也。承公命爲序，故及之。公名選，字士賢，浙之臨海人。先公勿齋先生宰新城，遺愛在民，公稱其家學云。

贈容一之歸番禺序

容生卓錫無地，從予遊者十有一載，未嘗對人作皺眉狀。入京師，見聲利烜赫，輒不樂。語人曰：古之仕者將以行其志耳，徒食人祿而不知耻，雖吾不能以一日居。生之志可謂篤矣。顧以予之踈謬，不能輔其爲仁，是生雖有美質，而其學未底於成。由吾之虛名誤之也。雖然，生之志豈易量哉！聖賢之言具在方冊，生取而讀之，師其可者，改其不可者，直截勇往，日進不已。古人不難到也，但恐游心太高，著蹟太奇，將來成就，結裹處既非庸常意料所及，而予素蹇鈍，不能追攀逸駕，仰視九霄之上，何許茫茫。生方銳意以求自得，亦將不屑就予，又安知

足履平地者果爲何如也千里之行始乎跬步生慎由之陳先生習忘久矣生歸見毅卿其亦以是語之

味月亭序

成化丙午春正月五羊何子有載酒過白沙對月共飲延緣數夕告予曩夢遊仙甚適扁所居第爲味月亭識夢境也願乞一言以歸予口占一絕句云騎羊仙客去仙城風韻千年落杳冥羅浮道士來何處笑倒君家味月亭戲謂子有曰君不知羅浮道士耶嘗俛仰子之亭矣因撫掌笑前此五年予被徵過郡通名子有之廬道士即予蓋寓意耳

認真子詩集序

詩之工詩之衰也言心之聲也形交乎物動乎中喜怒生焉於是乎形之聲或疾或徐或洪或微或爲雲飛或爲川馳聲之不一情之變也率吾情益然出之無適不可有意乎人之贊毀則子虛長楊飾巧夸富媚人耳目若俳優然非詩之教也甚矣詩之難言也李伯藥見王通而論詩上陳應劉下述沈謝四聲八病剛柔清濁靡不畢究而王通不答薛叔曰吾嘗聞夫子之論詩矣上明三綱下達五常於是徵存亡辨得失小人歌之以貢其俗君子賦之以見其志聖人采之以觀其變今子之

言詩是夫子之所痛也。南朝姑置勿論。自唐以下。幾千年於茲。唐莫若李杜。宋莫若黃陳。其餘作者固多。率不是過。烏虜工則工矣。其皆三百篇之遺意歟。率吾情益然出之。不以贊毀歟。發乎天和。不求合於世歟。明三綱。達五常。徵存亡。辨得失。不爲河汾子所痛者。殆希矣。故曰詩之工。詩之衰。夫道以天爲至。言詣乎天曰至。言人詣乎天曰至。人必有至人。能立至言。堯舜周孔至矣。下此其顏孟大儒歟。宋儒之大者曰周曰程曰張曰朱。其言具存。其發之而爲詩亦多矣。世之能詩者。近則黃陳。遠則李杜。未聞舍彼而取此也。學者非歟。將其所謂大

儒者。工於道。不工於詩。歟。將未至於詣乎天。其言固有不至歟。將其所謂聲口弗類歟。言而至者。固不必其類於世。或者又謂詩有別材。非關書也。詩有別趣。非關理也。則古之可與言詩者。果誰歟。夫詩小用之則小。大用之則大。可以動天地。可以感鬼神。可以和上下。可以格鳥獸。四時行焉。百物生焉。皇王帝霸之褒貶。雪月風花之品題。一而已矣。小技云乎哉。都憲朱公以其所爲詩。編次成帙。題曰認真子集。授簡於白沙陳獻章曰。爲我序之。公昔語我於蒼梧曰。詩非吾所長。公豪於辭矣。而未始以爲足。認真子名集。公意有所屬。顧覽者未必知。

白沙子全集 卷之一  
而吾以是覘公之晚節也。詩雖工，不足以盡詩；而況於盡人乎？謂吾不能於詩，而好爲大言，不知言者也。公名英，字時傑，郴陽人。由進士歷官中外，節用而愛人。

送李世卿還嘉魚序

弘治元年戊申夏四月，湖廣嘉魚李承箕世卿自其鄉裹糧南望大庾嶺，沿途歌吟，入南海訪予白沙。一見語合意，先是五六年予會都憲公之子承恩於北京，承恩世卿從弟也。示予以世卿之文，出入經史，跌宕縱橫，筆端滾滾不竭，來數千言沛然出之。若不爲勢利所拘者，予時未識世卿，而知世卿抱負有大於人，既不忘於心。

亦時於詩焉發之。或聞論當世士有文章，必問曰：如李世卿否？然又意世卿少年凌邁高遠，則有之；優游自足，無外慕嗒乎若忘，在身忘身，在事忘事，在家忘家，在天忘天下，忘天下，世卿未必能與我合。孰知世卿有意於來耶？自首夏至白沙，至今凡七閱月，中間受長官聘，修邑志於大雲山，五十餘日，餘皆在白沙，朝夕與論名理，凡天地間耳目所聞見，古今上下載籍所存，無所不語，所未語者，此心通塞往來之機，生生化化之妙，非見聞所及。將以待世卿深思而自得之，非敢有愛於言也。時時呼酒與世卿投壺共飲，必期於醉，醉則賦詩，或世卿唱，予



白沙子全集 卷之一  
和之或予唱而世卿和之積凡百餘篇其言皆本於性情之真非有意於世俗之贊毀至是世卿以太夫人在堂辭去欲留不可爲古詩十三首別之諸友相繼有言世卿歸以所聞於予者質諸伯氏茂卿登大崖山吟弄赤壁之風月予所未言者世卿終當自得之世卿之或出或處顯晦用舍則繫於所遇非予所能知也予老且病行將采藥於羅浮四百三十二峰以畢吾願世卿能復索我於飛雲之上否耶序以送之

送張進士廷實還京序

鄉後進吾與之游者五羊張詡廷實始舉進士觀政吏

部稽勲尋以疾請歸五羊五羊大省地廷實所居戶外如市漠然莫知也自始歸至今六年間歲一至白沙吾與之語終日而忘疲城中人非造廷實家不得見廷實而疑其簡實不然也蓋廷實之學以自然爲宗以忘已爲大以無欲爲至即心觀妙以揆聖人之用其觀於天地日月晦明山川流峙四時所以運行萬物所以化生無非在我之極而思握其樞機端其銜綏行乎日用事物之中以與之無窮然則廷實固有甚異於人也非簡於人以爲異也若廷實清虛高邁不苟同於世也又何憂其不能審於仕止進退語默之槩乎道也茲當聖天

子登寶位之明年思得天下之賢而用之而廷實之病  
適愈太守公命之仕廷實不得以未信辭於家庭於是  
卜日告行於白沙留二十餘日去歲之冬李世卿別予  
還嘉魚贈以古詩十三首其卒章云上上崑崙峰諸山  
高幾重望望滄溟波百川大幾何卑高入揣料小大窮  
多少不如兩置之直於了處了世卿豪於文者也予猶  
望其深於道以爲之本廷實至京師見世卿重爲我告  
之廷實所以自期廷實其自信自養以達諸用他人莫  
能與也

壽張撫州六十一詩序

有剛氣者常伸於萬物之上人謂兩山傲豈真傲者耶  
兩山謝郡歸今年六十有一矣兩山之子詡也從予遊  
限於官守不得奉卮酒爲兩山壽爲作長句以壽之其  
辭曰太守春秋踰六十面如丹砂髮如漆揮毫落紙神  
飄逸拄頰向空思紆鬱白雲滿野山露骨誰道頭銜非  
外物笑傲得之寵爲失平生自許剛不屈兩山宴坐何  
處山願效南山保終吉弘治庚戌二月初吉白沙陳獻  
章書

望雲圖詩序

弘治辛亥十二月作

意所嚮往處非乘雲御風身不可得而至窮之乎山川

委之乎官守曠之乎歲月當食食忘當寢寢廢一有感乎外而動乎中終日視而目不瞬以言乎化外不化而內化以言乎情則哀而不傷至矣乎非子之於親則臣之於君過而不過其狄梁公歟梁公仕唐在武后朝以一身繫唐宗社之重扶陽抑陰光復唐祚事載簡冊昭若日星夫梁公可謂有大功於唐矣賢者識其心自望雲一念中來故曰求忠臣必於孝子之門今王公少孤事母夫人以孝聞稱於藩臬諸公者無異辭公山西人也奉命來南海幾年念太夫人春秋高不得左右朝夕侍以爲憂與人言輒流涕嗚咽而不自勝先公之逝公

方委齒已能慟絕復蘇蓋公之孝自天性非由勉慕乎外於是諸公命工繪望雲思親圖以表之復相與賦詩道其事於古岡病夫陳某俾序之頃者公乘廣海之舟道經新會吏民親公如親賢大夫忘乎公之爲貴也時情俗態好佞諛而樂承奉皆是也公一濯之清風而民稱其不擾夫以今日之所聞徵諸古若梁公之事然後識其中之所存苟無是心有文章足以收譽於衆口有功業足以耀榮於一時有名節足以警動乎流俗皆僞而已豈能久而不變哉夫孝百行之源也通於神明光於四海堯舜大聖也孟子稱之曰孝弟而已矣故君子

莫大乎愛親嘗取李令伯陳情表讀之有不感咽流涕  
廢書以歎者乎烏虜令伯之表太行之雲也斯圖也若  
之何使王公見之慰其憂增其憂殆非所以處王公也  
雖然君與親一也在親爲親在君爲君世寧有篤於親  
而遺其君者乎圖而賦之以表公之孝以勸公之忠而  
又以公之能愧人之不能振頽風扶世教固有位者之  
事諸公豈無意乎覽者當自得

### 周氏族譜序

周氏之上世居洛陽自昭信府君仕元爲昭信校尉累  
有功世祖嘗手撫其肩寵之時人爲之號曰御搭手周

云厥後從伯顏下江南始不樂仕退隱湖州之長興尋  
徙德清因感異夢求卜地於縣西門外積谷口之前  
一里許山水明秀一如夢中所見大喜以爲神授遂定  
居焉昭信娶長興姚氏生兩提舉公長公一子諱子成  
居本里井頭少公長子諱亨甫元季任典史居河口次  
子諱通甫居縣西各隨所居地爲派長公之派一少公  
之派二統之爲三大派三派之後或隱或仕國朝洪武  
初任戶部主事諱子和者典史君之次子顯於河口縣  
西自通甫君以下六傳至封君鼎以其子今吾省少叅  
公之貴封禮部員外郎少叅公中成化乙未進士第選

白沙子全集 卷之一  
工部主事遷禮部員外郎繼遷郎中遂叅吾省諸派之中此其尤顯者也公以弘治己酉始至白沙未幾公復來與言家世纓簪以其族之譜請序以付梓予以不敏弗許數載之內屢致書囑邦伯東山劉先生按察使陶公交致其懇既而公復以書來曰吾周氏自昭信以上居洛陽世次無攷今譜斷自可知以昭信府君爲第一世祖其不可知者闕之不敢妄有攀附以誣先代而誑後人先生幸爲某序之將無負於先生之言某於是不能復以不敏辭於我少叅公而嘉周氏之譜不務窮於遠爲信譜也

記

韶州風采樓記

弘治己巳冬作

宋仁宗朝除四諫官其一人忠襄余公也蔡君謨詩云必有謀猷禪帝右更教風采動朝端弘治十年春韶守錢君鏞始作風采樓與張文獻風度樓相望忠襄之十八世孫英走白沙謁文以表之夫自開闢達唐自唐達宋至於今不知其幾千萬年吾瞻於前泰山北斗曲江公一人而已耳吾瞻於後泰山北斗公與菊坡公二人而已耳噫士生於嶺表歷茲年代之久而何其寥寥也則公之風采在人爭先睹之爲快如鳳凰芝草不恒有

於世也可知矣。如公之才得行公之志，所謂障百川而東之，回狂瀾於既倒，公固有之。公有益於人國也大矣。雖然，一諫官豈能盡公哉？顏淵問爲邦，孔子斟酌四代禮樂告之。顏淵處士也，何與斯理耶？居陋巷以致其誠，飲一瓢以求其志，不遷不貳以進於聖人，用則行，舍則藏。夫子作春秋之旨，不明於後世矣。後之求聖人者，顏子其的乎？時乎顯則顯矣，時乎晦則晦矣。語默出處，惟時豈苟哉？英乎勉諸母，曰忠襄可爲也，聖人不可爲也。

古蒙州學記

立山復州治之幾年，今雲南左布政使樂安謝公綬始

領右方伯之命來廣西，其民舉欣欣然喜而相告曰：公復來，公復來。廬陵彭君栗適知州事，問於諸父老。諸父老蹠而言曰：是再造我民者，我何可忘。吾州古蒙州也。唐改立山縣，國朝洪武間革縣爲古眉巡檢司。時草寇竊發，民亡者過半。比年以來，徭獍橫據其地，盜日滋而民日孤。成化丙申，巡撫都御史朱公英督兩廣軍征荔浦，破賊，賊懼，招之。獍老李恭著首遣其子來納款。公前以參議佐巡撫於戎，議城立山。立山本州治在桂林平樂之間，爲藩腹心。今之憂無控暴之地，以居民耳。州復則民定，尋請於上許之，乃營立山。是役也，公與按察副

白沙全集卷之一  
使范公鏞都指揮王公輔更主相之明年丁酉州治成  
方進軍荔浦時桂山巖恃險後下一軍怒將盡殲之公  
廉其脅從者得七百餘人釋遣歸農賊以此傾信招所  
至徭獍視我立山咸來此公以好生一念之仁代血戰  
數萬之兵也今也吾民之亡者復復而爲州昔之戕吾  
民者今革面爲編氓我有農桑我有塾庠生我有養死  
我有藏公之再造我民也我何可忘於是彭君籍記諸  
父老之言將碑於學官以傳而謀於提學時可周先生  
周先生三致彭君之懇於予俾爲之記嗟乎彭君誠不  
私於公而思惠其州之人士乎請爲言之七百死命歸

農何致群兇之納欵州亡州復在民何關於公之一念  
動於此應於彼默而觀之一生生之機運之無窮無我  
無人無古今塞乎天地之間夷狄禽獸草木昆蟲一體  
惟吾命之沛乎咸吉程子謂切脉可以體仁仁人心也  
充是心也足以保四海不能充之不足以保妻子可不  
思乎聖朝倣古設學立師以教天下師者傳此也學者  
學此也由斯道也希賢亦賢希聖亦聖希天亦天立吾  
誠以往無不可也此先王之所以爲教也舍是而訓詁  
已焉漢以來陋也舍是而辭章已焉隋唐以來又陋也  
舍是而科第之文已焉唐始濫觴宋不能改而波蕩於

元至今又陋之餘也。夫士何學？學以變化氣習，求至乎聖人而後已也。求至乎聖人而後已也，而奚陋自待哉？孟子曰：人皆可以為堯舜。周先生師表一方，彭君為州守，謁文山澤之癯，非俗吏是以冒言之。諸生疑焉，請質於周先生，其必有興起焉者，甲倡焉，乙和焉，俛焉孜孜，其傳寔多，其化寔博，其於公也有光焉，則斯文也，其猶庶幾泮水之頌歟？於是乎書。

程鄉縣儒學記

弘治癸丑七月作

潮之程鄉縣儒學傾圮久矣。今按察僉事雩都袁公慶祥處分以新之，明年巡按廣東監察御史劉公纓分巡

嶺東道僉事王公某往來為之勸借財用，或拓地以相其成。凡學宮之設有文廟，有明倫堂，前後位置，所具皆同。亦程鄉之舊也。袁公因地之形勢，廣狹而更張之，尊左則廟，次右為堂，皆南面而並峙。此則學之大觀也。廟主以像世相沿襲，有異授之嫌，而未詳其所自。意者古以尸祭之遺意，與廟前樹杏為壇，夾以兩廡，戟門之東祠鄉賢，西祠后土，泮池在櫺星門之內，池之左為宰牲所，堂之東西偏為兩齋，為諸生號舍，道義門與儒學門相望，東廡之上神庫，西齋之上神厨，廟與堂之間會饌堂居之，北列廨宇，凡此皆出於袁公之規畫，授圖於縣



令俾成之總之爲屋若干楹自辛亥迄癸丑三易寒暑而後成其形勝雖極壯麗則亦天下之通制不書可也袁公不以風教落第二義追惟古先聖王立學教人之本意而作新之袁公所以望於程鄉則不可不以告也今夫南面而堂一以奉古之人一以居今之人卑尊並立乎其間此雖因地而寓形而教未始不存也夫子太極也而人有不具太極而生者乎語以四科稱群弟子由漢而來儒者以言語稱者幾人以政事稱者幾人以文學稱者幾人其間足以方駕乎古人而絕塵於當世者亦鮮矣况德行乎顏子超然有見於卓爾之地所以

遨遊乎聖人之方而立同乎聖人之神者非可揣摩而得也故其言曰夫子步亦步趨亦趨夫子奔軼絕塵而回則瞠乎其後微顏子其孰能知之親切如此夫苟從事於斯雖未即優入顏域亦庶乎閔冉之間而由求又有不屑爲者矣予嘗聞程鄉風俗善多而惡少孟子曰雞鳴而起孳孳爲善者舜之徒也雞鳴而起孳孳爲利者蹠之徒也夫三尺童子聞人稱其善則喜稱其惡則怒是何心哉予老矣彼將有感吾言而興起者乎縣令辛君竟以袁公之命具其事之本末遣生員陳珀乞記於予故爲之一言葉柏鍾譽楊偉咸以義官董茲役柏

又偕珀來謁文費莫大於納粟指揮陳昂義官鍾華次之其餘助者又七十餘人名氏多不能具載宜列之碑陰云

程鄉縣社學記

弘治庚戌秋作

國朝開設學校自胄監至於府州縣備矣惟鄉之社學不列於官待有司而後興吉之永豐劉侯彬由戊戌進士來令程鄉首以教化風俗爲事相地邑中得東西員城得水南村北距城五里得大枯樹南距城八十里各就其地之便建學宮一所爲社學者四學宮之制正北爲正蒙堂東西兩齋相向者無不同也其在東者堂後

考亭之祠前有春浣池詠歸橋皆揭之於亭其在西者堂南考亭之祠其後退省有軒燕休有所在南北者咸無焉此小子之學也是學也貧富貴賤才不才共之無所擇於其人學宮既成侯以諭諸父兄諸父兄咸喜退各以其子弟來受學則爲延師以教之買田租米一百石以供束脩之需品量所給視所領子弟多寡東西各四十石水南之受二十石大枯成於諸學之後未有受焉縣東五六里有地曰周溪山勢自北而來迤邐南下峰四遠如城遠望不知溪發處但見自出山東北隅流入溶溶洋洋橫於坡陀之麓上有曲池狀如半月侯顧

而樂之又愛溪之名尋即其地構堂於曲池之上最高處圖太極圖於北壁前作講堂左右爲樓居樓外鑿二石井泉甘而冽謂之天泉井榜其門曰周溪書院周溪之門少東過雲步橋北折數百步山曰雲洞與太極堂東西相望因闢地作亭寓之雲谷之號侯政暇輒往遊焉瞻眺徘徊如有求而弗得侯安取於山水若是勤哉以上諸役及買田之費侯悉以其在官所當得者積歲成之一不以擾民教諭李君欽訓導陳君祿具圖與事遣生員鍾宏走白沙屬予記之古者王畿置小學於辟雍之側其在侯服邦國則列於庠序之右今之郡縣學

古之大學也今之社學猶古之小學也天下風俗美惡存乎人之賢否存乎教觀今之風俗則今之人才可知矣予嘗終夜思之其不及古者有司非與庠序之設六經之訓固在也以小學言之朱子小學書教之之具也社學教之之地也其皆不可無也天下之事無本不立小學學之本也保自然之和禁未萌之欲日就月將以馴致乎大學教之序也然則社學之興在今日正淑人心正風俗扶世教之第一義也胡可少哉胡可少哉侯之心猶未但已也曰我有司也資於何以治資於何以教山名水名我思古人世豈無庶幾者乎於是爲之

意以感之爲之地以處之十數年間東西行過程鄉者多矣未聞有吟風弄月而來足以副侯之心者侯豈敢必哉或謂予曰侯來程鄉居幾年寄懷山水之間不屑屑於簿書侯何心今且去程鄉矣侯其埃溘斯世將高棲而遠遁乎以是爲知侯予益不知也併記於是

重修梧州學記

弘治戊午三月作

百粵之區幾千里東望五羊西通八桂蒼梧界其間皆古之名郡也成化改元都御史韓公始於梧州開設三府病一學宮之不稱亟選地於州城之南一里許遷焉弘治丁巳秋鄧公來總督兩廣軍務謂不可以軍旅之

事先俎豆於是因前人之舊規而益修之凡韓公所欲爲而未暇及者至是大備蓋昔之薄者厚之卑者起之表柱石以壯闕門榜化龍而儕起鳳神厨神庫交映乎前禮堂膳堂並立於後齋舍廊廡登降階級莫不奐然一新盛矣哉夫人之去聖人也遠矣其可望以至聖人者亦在乎修之而已苟能修之無遠不至修之云者治而去之之謂也去其不如聖人者求其如聖人者今日修之明日修之修之於身修之於家國修之於天下不可一日而不修焉者也明道先生言於朝曰治天下以正風俗得賢才爲本彼學政之不修斯道之難立後生

無所興起無以成造就之功然則風俗何由而正賢才何自而得耶因時而立教即物以顯義意者督府所望於蒼梧之士寧不有在於斯乎嗟夫有開厥先有成厥後喜二美之駢臻超八荒而獨立然後見夫子之門廓然洞開可望而不可即况於廣大尊嚴端凝灑落默契乎人心正大之所存與山岳而並峙顯著乎烟霞歲月之所積與大化而同流不可動搖不可束縛也哉此則病夫所自勵以佐督府所望於蒼梧之士者也州別駕謝君湖承督府命董茲役至是訖工復以教授鍾君偕生員陶荆民來徵記章於督府舊也督府命之義不可辭於是乎書

龍岡書院記

父兄不以其言為子弟師業修於身子弟習而化之其為教也不一因其世箕裘異焉耳農商技藝各有教豈直士哉昔者堯舜禹湯文武周公道大行於天下孔子不得其位澤不被當世之民於是進七十子之徒於杏壇而教之擇善力行以底於成德其至也與天地立心與生民立命與往聖繼絕學與來世開太平若是者誠孔子之教也大哉教乎今父兄愛其子弟教以六經誦之也惟恐其言之不熟講之也惟恐其旨之不明似矣

白沙先生全集 卷之一  
不知其身之所教與七十子之進於聖人同歟否耶江  
西撫之樂安有龍岡書院今都御史謝公綬六世祖均  
福始建與其弟均壽講學其中福後以宏詞領信州壽  
亦舉進士守來陽歲久棟宇就廢公之父某復即其地  
而新之既而諸子皆以文章取科第爲顯官公謂其子  
琪曰書院無田奚以守琪買田百畝擇謹厚者掌之以  
供祭祀及束脩之費公巡撫湖廣兩遣使走數千里至  
白沙謁文記之且以教其族之人予少無師友學不得  
其方汨沒於聲利支離於糝糠者益久之年幾三十始  
盡棄舉子業從吳聘君遊然後益歎迷途其未遠覺今

是而昨非取向所汨沒而支離者洗之以長風蕩之以  
大波惴惴焉惟恐其苗之復長也坐小廬山十餘年間  
履跡不踰於戶闕俛焉孳孳以求少進於古人如七十  
子之徒於孔子蓋未始須臾忘也謝氏之先以儒起家  
傳數世至公父子兄弟皆能以文章取科第出爲當世  
用肩摩踵接盛於一門其得於龍岡者不亦多乎雖然  
父兄之教子弟之學將不但如是而已也今之學於龍  
岡者一短檠課之外未有聞也公能亮予言否耶橫渠  
先生語學者必期至於聖人而後已予於謝氏豈敢謂  
秦無人

白沙先生集卷之一  
丁知縣廟記

弘治丁巳春作

丁侯爲縣六年卒於官歷觀我邑令自洪武迄今求丁侯未有也侯仕不爲已耻以俗吏自居始至著禮式一編擇立鄉老各數人使統之俗淫於侈靡富者殫財貧者鬻產上無以爲教下無以爲守俗由是益壞鄉都老以禮正之每歲按民丁產輸錢謂之均平錢上下交侵民受其害侯量入爲出歲輸以還使民不知有役民甚賴之時有橫徵虐民必蹙眉曰守令之政在養民坐視其困而不救安在其養民也力請罷之雖以此得罪不恤也侯之性略於承奉而嚴於鬼神灌獻必親執事有

恪春秋之祭肅如也凡祀典所載有功於名教者爲立祭田使人守之其不應祀者毀之至於接人也亦然可者與之不可者斥之其馭吏也不察察於案牘吏不敢欺其益衆也民服其威斷明察奸僞鮮作夫縣令官卑刑賞不加於天下而天下治忽由之知遠之近知風之自知微之顯故予嘗謂侯用世才其有所試矣夫豈苟哉侯以仕爲學政暇必走白沙往返歲月內不知其幾顧何取於白沙耶甚矣人不可無志也正其誼不謀其利明其道不計其功侯亦無所不願學而切於救民急先務也死之日耕者弔於野行者弔於途有老嫗夜哭

於其廬旦往問之云。嫗何哭之哀也。曰。開歲役且至。死者不可作已。故侯之爲縣。多可書。其得民之實在節用。死之十有二年。邑人共立廟於白沙。祀之如不得已焉。者。思侯之功。表之。非以徼福於神也。後來繼令者。亦將有感於斯乎。侯名積。字彥誠。成化戊戌進士。寧都人。

肇慶府城隍廟記

弘治甲寅夏作

端陽城隍廟在刺史堂之西。歲久就敝。弘治癸丑冬。郡守黃侯撤而新之。命生員陳冕來徵記。侯豐城人名。琥予曩從吳聘君游。往來劒水。嘗一宿其家。自侯來守端陽。七年於茲。愈相傾慕。安能已於言耶。今天下府州縣

有城郭溝池。有山川社稷。有神主之。而皆統其祭者。謂之城隍神制也。不俟言矣。然神之在天下。其間以至顯稱者。非以其權歟。夫聰明正直之謂神。威福予奪之謂權。人亦神也。權之在人。猶其在神也。是二者有相消長盛衰之理焉。人能致一郡之和。下無干紀之民。無所用權。如水旱相仍。疫癘間作。民日洶洶。以干鬼神之譴怒。禍福人有賞罰。失於此。得於彼。神其無以禍福代賞罰哉。鬼道顯人道晦。古今有識所憂也。中庸曰。致中和。天地位焉。萬物育焉。說者謂吾之心正。天地之心亦正。吾



之氣順天地之氣亦順烏虜孰能信斯言之不誣也哉  
侯治端陽民畏而愛之蓋有志者也故專以其大者告  
之餘皆在所略

恩平縣學記

恩平古恩州之域國朝置恩平驛隸陽江縣今恩平堡  
是也堡立於成化之己丑先是西獠入寇景泰天順間  
剽掠高涼以東亘數百里無完城民爭起從賊遠邇巢  
壘相望此其地也成化改元聖天子念兩廣夷賊未平  
命將討之而用其偏師於此既而賊勢復熾當道者以  
恩平地四達難守簡畀我邑令鬱林陶侯素有威略至

則急擣其巢穴既殺其桀黠者遂以其衆還各郡縣且  
數萬人而又慮其向背靡常即一旦復起爲患有如前  
日充斥其將何以待之此堡所以建也成化丙申右都  
御史郴陽朱公奉勅總督兩廣軍務既至環胝列郡昔  
嘗爲賊所破者亟謀所以善其後謂恩平故多虞且其  
地介數邑之間當東西行之衝送往迎來民劬於道路  
者無虛日不如以堡爲邑便會我陶侯亦以邊功累陞  
按察副使奉璽書專經略是方公於是俾侯成之區畫  
既定悉以上聞凡割陽江新會新興三縣人戶三千戶  
糧一萬石縣仍驛名城以堡建無所改於其舊城之中

為治戎之所東則縣治西則學宮學宮既成諸士子遠  
近雲集學舍不能容誦絃之聲盈耳過者歎曰美哉洋  
洋乎昔為盜賊之壘今為詩書之府誰之力歟邑令翁  
君以書屬予記其事而尤於學宮惓惓焉嗟夫翁君其  
知理民之本乎自有邊患以來狼吞虎噬以殘民之生  
人所知也湯沸火烈以賊民之性人未必知也顛沛流  
離死生利害怵於前而父子失其親兄弟失其愛水火  
之患不息鬪爭之情日熾則五品之倫五常之性幾何  
而不與生俱滅耶故夫君子之政在拯民則軍旅之興  
有時而不獲已在於防民則俎豆之事安可一日而不

講也今寇患雖平民俗未新邑長以是為政而忠信發  
之學官以是為教而忠信導之諸士子以是為志而忠  
信體之習端而俗正教立而風行民樂生而好亂者息  
士有耻而慕義者衆則刑罰可省禮義可興囹圄可空  
干戈可戢守令之責盡矣而君之心寧不亦樂於斯乎  
予不文謹具其事之始末與其所當先者以復君碑於  
學宮俾來者有攷焉君名儼莆陽人

新遷電白縣儒學記 成化壬寅十二月作

邑何遷遷避寇也先是電白在高州府治之東按察僉  
事陶公提兵過之顧謂其守宰曰形勝不足以守邑宜

遷遷必於神電衛焉其地廣可以容其城固可以守去  
危即安民之賴也舍茲弗圖志不在民也知府孔侯鏞  
以公之說聞於上遂遷焉時成化戊子歲也學宮在縣  
治東南當是時寇賊未殄草屋一間奉大成木主而  
已歲丙申公以秩滿遷副使奉璽書專經略是方每一  
過之未嘗不瞻顧徘徊以學校之興廢爲已責而歎其  
力之未遑也明年寇乃克平是方之民寄命於盜賊之  
水火者幾二十年至是始追公往來巡省諸郡縣俾勞  
來匡直咸盡其方越二載而民之病者蘇仆者起矣公  
顧力可及以狀請於欽差總督兩廣軍務右都御史朱

公首創學宮次及諸役許之於是闢土爲基度財爲用  
而屬是役於某官某使督之以己亥三月某甲子始事  
越明年八月某甲子而舍菜焉宮宇幾兀門觀軒敞神  
像清嚴器用具足繚之以宮墻飾之以丹漆誠壯誠麗  
遂爲一郡學校之冠其他若縣治若城隍社廟若藩臬  
行司以及郵傳邸舍橋梁道路一一區畫成之營材於  
山民不知勞爲陶於野財不妄費而皆以一當百以百  
當萬故役之煩者化而爲簡難者化而爲易公勲庸著  
於武事不可勝計世稱公通變無方亦焉往而非是也  
哉韓君某來守是郡既至觀衆美之具成乃歎曰博哉

白沙子全集 卷之一  
功乎。歷審其爲之先後，又嘆曰：公留意學校，功先庶務，其重如是乎？乃具書幣，遣其屬蔡鍾英如白沙，請予記之。辭不獲，推古學校之意而言曰：學校一也，所以有古今之異者，存乎人。孔子曰：古之學者爲己，今之學者爲人。程子曰：古之仕者爲人，今之仕者爲己。夫學以求仕之所施，仕以明學之所蘊，如表裏形影然。臯夔稷契伊傅周召，其載於典謨訓誥，仕者之所施也；有爲己之心乎？顏曾思孟、周程張朱，其傳於著述文字，學者之所蘊也。有爲人之心乎？諸君子顯晦不同，易地而處之，有不相能者乎？自古有國家者，未始不以興學育才爲務。然

自漢而下，求諸學校之所得名世者幾人，有不由庠序而興者乎？是故學校之設，其重在於得人，學之道其要在於爲己。古之名世者，舍是無以成德，甚矣斯學之不講於世也久矣。公所望於學校，意者其在此乎？公名魯，字自強，廣右之鬱林人也。始恩授吾邑丞，公之先公成，浙江按察副使，死事武義云。

新會縣輔城記

吾邑輔城，周遭六七里，高若干尺，東南際水，西北鑿城，下爲池，旁植刺竹，施蒺藜，其中爲營門以守。嘗記往年西寇之來，憑陵高涼，以東破關，襲城勢如建瓴，至此則

截然而止如虹霓之收急雨由是而吾民之邱隴以完  
室家以安雞犬以寧倉箱以盈燕有歲時樂有賓客至  
於今各得其所者則誰之賜乎始者吾謂陶公曰孔子  
曰言忠信行篤敬雖蠻貊之邦行矣以此而盡吾心則  
庶政無不脩用人無不當理財無不富治兵無不强不  
知乎此而欲徒恃其末蓋後世以法劫制天下區區之  
爲也公之功固大矣而聖人之道非耶公曰不然行聖  
人之道有二術內之曰心外之曰權無其心則權爲挾  
私妄作矣無其權雖有其心將安施哉今夫用行伍之  
人取其長不責其備宥其過以圖其功可也或者過於

求實一疵不貸而用舍乖張矣今夫理財於擾攘之秋  
非常賦剋取之民故椎牛灑酒豐犒厚享非以醉飽爲  
德所以作士氣也顧小利而忘其大體者則朝夕與小  
吏計牙籌算贏餘矣今夫治兵於闕外號令則大將主  
之而吾每以偏師從事况夫深山窮谷民獠雜居善惡  
同狀生殺在前而節制不一沮我者惟以殺無辜爲言  
矣此事之所以難行而心之所以不孚於人也嗚虜兵  
凶器也豈得已哉公從事於茲餘二十年吾民之老者  
以死少者以壯事功在邊隅日遠日忘蓋不可以無紀  
而垂告於將來也今西師戒嚴盜賊塞路吾欲於知力

之外而網維乎是則孰與語哉

### 雲潭記

白沙之西山則圭峰也東北連數峰最勝者爲綠護屏屏之南有潭淵然曰聖池下蟠蛟龍龍噓氣成雲變化萬狀里生周鎬偕其季京來謁予白沙時維仲春風日晴美予與二子携酒飲於西山之麓班荆而坐仰而四顧有雲起綠護屏炫爛如丹青郁紛若祥瑞予顧謂二子曰是聖池之雲也偉哉觀乎二子愀然正襟侍側曰是吾先子之志也先子居龍溪垂五十年無他嗜好惟喜爲雲潭之觀故先子之號曰雲潭予曰嘻有是哉若

先子我舊不幸早世不及見若兄弟長也若豈盡聞之乎居吾語汝夫潭取其潔也雲取其變也潔者其本乎變者其用乎二子齊應曰然予曰未也野馬也塵埃也雲也是氣也而雲以蘇枯澤物爲功易曰密雲不雨自我西郊是也水以動爲體而潭以靜爲用物之至者妍亦妍媸亦媸因物賦形潭何容心焉是之取爾二子喜相謂曰先生命我矣於是復進而告之曰天地間一氣而已屈信相感其變無窮人自少而壯自壯而老其歡悲得喪出處語默之變亦若是而已孰能久而不變哉變之未形也以爲不變既形也而謂之變非知變者也

夫變也者。日夜相代乎前。雖一息變也。況於冬夏乎。生於一息。成於冬夏者也。夫氣上蒸爲水。下注爲潭。氣水之未變者也。一爲雲。一爲潭。變之不一而成形也。其必有將然而未形者乎。默而識之。可與論易矣。二子於是起而再拜。乞書爲雲潭記。

潘氏祠堂記

一善可書也。吾書之。吾畏多言也。信多乎哉。不多也。傷俗之益偷。吾無位也。言不能化而入。惡在乎多言也。善者吾斯進之而已矣。潘某氏者。南海之著姓。老而無子。曰吾無繼可也。兄弟之子猶子也。同吾胞者幾人。繼其

世者若干人。可以執籩豆。可以守宗廟。可以事繼述而傳無窮矣。吾何憂。吾無繼可也。以其所有者歸之祠。以卒噫。茲可憫也已。若是者。其亦足與乎。其無足與也。堯之時。比屋可封。降自後世。不以善而以利。父子也。而不用情。兄弟也。而鬪於墻。婦姑勃谿。朋友按劍者。皆是也。夫恒人之情。莫甚於顧其私。而不忘其後。某也。致孝乎。祖禰。委祝乎。兄弟。其生也。若遺。其死也。若虛。非求馬於唐肆者歟。未可知也。伯氏某。承某之志。以其地三畝。構祠屋三間。以奉四代神主。其田若干畝。以供常祀。詩曰。兄及弟矣。式相好矣。其斯之謂歟。某之從子。上舍生漢

白沙子全集 卷之一  
也有一日之雅於白沙來請記其事予不能辭也於是  
乎書

增城劉氏祠堂記

弘治癸丑九月作

古聖賢以民德歸厚必曰追遠又曰宗廟之禮所以序  
昭穆也序爵所以辨貴賤也序事所以辨賢也旅酬下  
爲上所以逮賤也燕毛所以序齒也廟始遷之祖而祭  
之古之制不可考已君子隨時變易以不犯其分而得  
其心蓋人情出於天理之不容已者夫何嫌與古之仕  
者世繼死者有廟生者有宗恩相慶而死相弔百世不  
相忘世降俗偷蓋有不然者矣邸第之雄田園之美肥

甘艷麗飽妻子祖考所棲與蟲鼠爲伍殘膏賸馥何有  
及之其鄙陋污穢可勝道哉中古之王天下者嘗爲鄉  
與大夫作家廟以愧之鄉大夫猶然况士庶乎先世之  
流風餘韻至此幾絕以吾之一身散而爲百體拔其一  
毛而心爲之痛是孰使之然哉且人之賦於天命者有  
賢不肖貧賤富貴之差吾之所以仁愛者未能皆然貧  
賤不薄於骨肉富貴不加於父兄宗族者誰乎故曰收  
合人心必原於廟宋之惠州守劉仲明自南雄遷增城  
有劉氏自仲明始也傳至今太學生癯十有二世其先  
世嘗廟而祀之不遷又置田以供祀事以圖無窮頽而



白沙子全集 卷之一  
復起者再矣。父有積薪，子不斫而爨之，世豈少哉？嚮自言系本元城，世有衣冠，曰緣者嚮之父也。曰漢曰孔祥者，嚮之諸父行也。一念追遠之同，天順甲申始拓廟旁之地而新之，廟成而諸父亡矣。成化庚子，嚮之兄瓚又率其族兄弟而增修之，前堂後院棟宇層起，煥如也。四垣竹樹周遭，過其門者咸以是稱焉。於前有光於後有繼於士大夫其無愧哉！今年秋，嚮因林時嘉再至白沙，予示之詩云：一雨變新涼，炎埃洗除盡。廬山昨夜燈已照，劉宗信故爲之記，以詔其後人。

永慕堂記

予幼時讀孟子，人少則慕父母，知好色則慕少艾，有妻子則慕妻子，仕則慕君，不得於君則熱中，大孝終身慕父母，五十而慕者，予於大舜見之矣。竊疑孟子之言，抑揚太過，愛親人子之至情，空汎待教而能不因物而遷人之異於聖人也。豈相懸絕若是耶？比弱冠求友於四方，多識當世之士，擇其賢者能者而師之，其不可者而改諸，內外輕重之間，槩以孟子之論，其役志於功名，其循情於妻子，其思慕其親，不以皓首而媿垂髻者，希矣。然後信孟子之知道不苟於言也。成化甲辰，江陰李君昆以侍御史被命以清理軍伍於兩廣，始過白沙，進拜

老母於堂予雅未識君之色而訝其憂之餘耳君之孝而訝其哀之餘意風木其心者恒怵惕於見人之親歟君曰然少留君坐語之以邕角所疑於孟子以壯而後信其言不予欺因與君論交焉它日再過白沙索書永慕堂扁予申以孟子之言曰人各有所慕仁者慕親義者慕君士慕學農慕稼穡百工慕能商賈慕貿遷無無慕者慕之至死而勿替乃至形乎動靜接乎夢寐通乎幽明皆性之所發而爲情有莫知其然而然者此之永慕是也夫孰得而奪之彼幼而慕壯而衰老而遂忘慕之不至而遷於物是之謂情其性非知內外輕重之別

者也夫忠孝之推也不孝於親而忠於君古未之有也御史諫官也繩人以身者也名堂之義其以忠孝示天下乎君聞之悅命左右滌硯乞書爲永慕堂記

潮州三利溪記

古今學者不同孔子以兩言斷之曰古之學者爲己今之學者爲人古今仕者不同程子以兩言斷之曰古之仕者爲人今之仕者爲己古之人人也今之人人也一也判而兩之其不可同者如陰陽晝夜則有其故矣聖賢之所以示人也知微之顯知顯之微學爲己也其仕也爲人學爲人也其仕也爲己斷不疑矣今守令稱賢

於一邦利澤及於民民愛而樂之問於我嶺南十郡之內吾知其人者周潮州也潮海郡也東南距大海望之渺漫接天習水者乘長風駕大舶出沒巨浪中小不支則有覆溺之患每歲漕運潮人共苦之潮州來守郡問潮父老所以便民者父老曰其惟三利溪乎潮五屬邑其三在郡治西南形若鼎立廣袤千里水曲折行其中而民共賴之者三利溪也是溪之長百一十五里東抵韓江西流入於港正統間湮於大水潮州濬而通之水由故道行東西注會同於海慮其冬旱而且涸也鑿郡城南溝引韓江水注於溪甃石爲關時而開閉之凡役

民於畚鍤卑之爲溪也高之爲關也僅一月而成農夫利於田商賈利於行漕運者不之海而之溪辭白浪於滄溟謝長風於大舶於是潮之士夫與其父老拜郡門謝曰利吾潮者吾父母也吾子孫敢忘之由是觀之謂周潮州仕而爲人也非歟吏於潮者多矣其有功而民思慕之唐莫若韓愈入國朝來莫若王源驅冥頑之鱷造廣濟之梁其事顯於爲人不可誣矣今潮州以三利溪配之輝映後先稱賢於一邦也宜哉夫短於取名而惠於求志薄於徼福而厚於得民非以奉身而燕及糞娶陋於希世而尚友千古黃涪翁之所稱者非濂溪先

生歟潮州遺予書曰我故春陵族也潮州之舉進士有聲郎秋官有聲守郡有聲其尚不忝其世也哉吾嘗贈之詩云楚中有孤鳳高舉凌穹蒼借問歸何時聖人在黃唐望之乆不至歲晏涕淋浪九苞有遺種不覺羽翼長三年集南海使我今不忘逍遙梧桐枝長飲甘露漿吾生濂溪數百年之後思濂溪而不可得見見其族之雲初若此者殆可與言矣然則區區所愛慕於周潮州者一關三利溪而已耶潮人相與立碑頌潮州之功遣生員趙日新來請文予以其事并詩記之俾潮之人知仕而為人者有功不可忘而潮州之進未艾也潮州名

鵬字萬里道州之永明縣人

先生文既成每詢之潮人多言三利之利無實因作

一詩以代跋云欲寫平生不可心孤燈挑盡幾沉吟文章信史知誰是且博人間潤筆金其意欲示後人失於噫斯言得之矣弘治甲子秋門人張詡識

尋樂齋記

五年伍光宇始構亭於南山之巖以坐明年復於吾居第之左結草屋三間與亭往來又明年而光宇死矣草屋之成光宇齋戒沐浴焚香更衣危坐厥明請予問曰雲不自知其力之不足妄意古聖賢人以為師今年且邁矣不得其門而入不知其所謂樂尋常間自覺惟坐為樂耳每每讀書言愈多而心愈用用不如不用之為

愈也。蓋用則勞，勞則不樂；不樂則置之矣。夫書者，聖賢垂世立教之所寓也。奚宜廢將其所以樂者，非歟？願先生之教之也。予復之曰：大哉吾子之問也！願予何足以知之？雖然，有一說，願吾子之思之也。周子程子大賢也，其授受之旨曰：尋仲尼顏子樂處，所樂何事？當是時也，弟子不問，師亦不言。其去仲尼顏子之世千幾百年，今去周子程子又幾百年，嗚呼！果孰從而求之？仲尼飲水，曲肱；顏子簞瓢陋巷，不改其樂。將求之，曲肱飲水耶？求之陋巷耶？抑無事乎？曲肱陋巷，而有其樂耶？吾子其亦慎求之，毋惑於坐忘也。聖賢垂世立教之所寓者，書也。

用而不用者，心也。心不可用，書亦不可廢。其爲之有道乎？得其道則交助，失其道則交病。願吾子之終思之也。仲尼顏子之樂，此心也。周子程子此心也。吾子亦此心也。得其心，樂不遠矣。願吾子之終思之也。語已，光字整步而出，恍然若有得者。歸揭其榜曰：尋樂齋云。

### 風木圖記

莆之李侯某，由進士官戶曹員外郎，出爲廣東按察僉事。每出行，部至新會，輒一過病夫陳某。白沙坐小廬山，精舍半晌，始至，携所得誌銘文，并挽詩一大帙來授而讀之。三歛衽先處，士默菴先生與林夫人之賢，皆可考。

而知矣。尋以風木圖請記。夫孝子之事其親，視於無形，聽於無聲，致愛則存，致愆則著。著存不忘乎心，奚存歿間哉？吾聞之。曾子再仕而心再化，曰：吾及親，仕三釜而心樂；後仕三千鍾，不泊吾心。悲！弟子問於仲尼，曰：若參者可謂無所縣其罪乎？曰：既已縣矣。夫無所縣者，可以有哀乎？彼視三釜三千鍾，如鸛雀蚊虻相過乎前也。今夫祿之弗逮，養曾子悲之；侯亦悲之。侯之心，曾子之心也。若曾子可謂盡思矣。奚事於圖？乃若孔子則以爲子之養其親，期於適焉耳。苟至乎適，雖聖人不能以有加也。遑問其他！具足於內者，無所待乎外；性於天者，無所

事乎人。又非但事親一事爲然也。一以貫之，其所稱孝，非常所稱。常所稱者，豐其養，厚其葬，生之封，死之贈而已耳。嗟夫！今之士夫，異於古之士夫也。其所稱孝，率以是爲至矣。吾恐聖賢之志，不明於後世也。既撫圖而悲，復引其意，謂侯曰：侯死事盡思，無負於曾子矣。亦知曾子所以顯其親於無窮者，何如哉？孝經曰：立身行道，揚名於後世，以顯父母，孝之終也。侯念之，侯念之，是爲記。

處素記

成化八年六月爲外兄何經作

一夫頽然始弱冠，爲生員，事進取，不偶，退耕於野，作室三間，榜兩處素字於楣，曰：吾不了其義，當否？吾以問白。

沙子白沙子聞之絕倒間數日抵一卷請曰爲我記處  
素白沙子命出硯研墨汁相向詰之曰夫記紀實也爲  
我具狀吾爲汝記即應曰毋苦我人呼我秀才我即不  
應謂我處素我即應之但子爲我記足矣吾知其狀云  
何兩手捧硯躡席揚眉進愈恭白沙子不能却墨其卷  
歸之

慈元廟記

世道升降人有任其責者君臣是也予少讀宋史惜宋  
之君臣當其盛時無精一學問以誠其身無先王政教  
以新天下化本不立時措莫知雖有程明道兄弟不見

用於時迹其所爲高不過漢唐之間仰視三代以前師  
傅一尊而王業盛猷畝既出而世道亨之君臣何如也  
南渡之後惜其君非撥亂反正之主雖有其臣任之弗  
專邪議得以間之大志弱而易撓大義隱而弗彰量敵  
玩讐國計日非往往坐失機會卒不能成恢復之功至  
於善惡不分用舍倒置刑賞失當怨憤生禍和議成而  
兵益衰歲幣多而民愈困如久病之人氣息奄奄以及  
度宗之世則不復惜爲之掩卷出涕不忍復觀之矣孔  
子曰人之生也直罔之生也幸而免劉文靖廣之以詩  
曰王綱一紊國風沉人道方乖鬼境侵生理本直宜細

玩著龜萬古在人心噫斯言也判善惡於一言決興亡於萬代其天下國家治亂之符驗歟宋室播遷慈元殿創於邑之厓山宋亡之日陸丞相負少帝赴水死矣元師退張太傅復至厓山遇慈元后問帝所在慟哭曰吾忍死萬里間關至此正爲趙氏一塊肉耳今無望矣投波而死是可哀也厓山近有大忠廟以祀文相國陸丞相張太傅弘治辛亥冬十月今戶部侍郎前廣東右布政華容劉公大夏行部至邑與予泛舟至厓門弔慈元故址始議立祠於大忠之上邑著姓趙思仁請具土木公許之予贊其決曰祠成當爲公記之未幾公去爲都

御史修理黃河委其事府通判顧君叔龍甲寅冬祠成是役也一朝而集制命不由於有司所以立大閑愧頽俗而輔名教人心之所不容已也碑於祠中使來者有所觀感弘治己未夏予病小愈尚未堪筆硯以有督府鄧先生之命念慈元落落東山作祠之意久未聞於天下力疾書之愧其不能工也

夢記

庚寅秋月距予自京師歸適踰一載是夕天氣稍涼予讀易白沙之東房既倦而卧夢與應魁殿元克恭黃門同行一童子前導不識者一人次之次克恭次予應魁



途遇泥濘予呼童子取行具童子不應予因曰越人歌之楚人聽之應魁屢歎不置克恭顧予作愁狀其不識一人者漠然若無所聞焉既寤測其意曰越與楚風氣不同人聲隨而異必不能相通而相好使越人歌之楚人聽之亦猶使楚人歌之越人聽之也孰若使越人歌之越人自聽之楚人歌之楚人自聽之其音習於其耳其言感於其心奚不相說之有是故越不可爲楚楚亦不可爲越越與楚不相能非有生之初習使然耳習之久殆與性成夫苟欲變之非百倍其功持之以久不可使化而入今若以爲越者一人驟而號於楚地曰去而爲楚者以從我楚得不群怒而逐之乎然則如何曰守其爲越者無遽責楚以必回庶乎其免矣

又

三月二十七日碧玉樓午睡夢出貞節門外大水一老人抱衣浣於前歌曰法好人莫傳衣好人莫穿良久又歌曰西子蒙不潔掩鼻過者疾趨而爭先雖有惡人齋戒沐浴被服明鮮以祀上帝執侍周旋與世駢肩吁是何夢耶將有應於後早爲之兆耶抑夢幻虛無同異端之說從而稽之因妄求妄不可耶姑記於此以俟明者決焉

白沙全集 卷之一  
吳川縣城記

書城濮城郎之旨得之春秋然後知長府之役可罷於魯人譏鄭子產惠而不知爲政非孟氏之過也昔寇盜充斥於高涼百姓凜凜委性命於豺虎之林今湖廣按察使前僉事吾廣鬱林陶公被命來專是方經略大著討賊之聲高涼以東之民莫不倚公以爲命寇既平公於是城吳川城厚一丈其崇三丈周五百八十丈亦勞矣自師旅興而民滋敝是役也公實圖之豈得已哉經始於成化戊戌之秋越明年冬城始克完民喜曰衛我者生我勞我者惜我公大惠我何可忘父老相與言於

官遣生員李凌雲以狀走白沙謁文記之時江梅始花風日晴美予與二三友登碧玉樓望厓山慈元廟新成與大忠祠映照下上顧謂凌雲曰是公與今都御史東山劉先生之所作也義以使民民爭趨之大有功於名教是之謂達爲政之首務皆可書凡公之功在民不違春秋義例可書時焉耳矣勉於無事之日如是而弗已焉其效不亦遠乎老子曰治大國若烹小鮮

襄陽府 先聖廟記

庚戌之夏侍御史襄陽曹君璘訪予玉臺山中間語及其太守郭侯之爲人予問治郡何如曰侯以政及於民

者民之口碑矣。復作而言曰：民知其小，不知其大。大者口碑不載，將載之石焉。然非屬筆於先生，則石有時而朽也。明日君還行臺，乃以其狀來。按狀襄陽先聖廟自建國以來有祭無樂。成化二十二年，侯以才御史來守是邦，告廟之日，大閱神庫，即議製之。顧以時詘舉羸未暇也。居三年，民之病者駸駸乎起矣。乃延神樂觀樂舞生周某於岳州，問所以製樂器者。其材孰難生曰：八音之中，其爲石乎？古取之於泗濱，今爲官所封，餘無難者焉。侯審歛象，使人於隆中山求得之。生爲揆其音曰：可矣。遂闢燕思堂於郡堂後爲之。每一器成，侯數四與

較期於至精而後已。越四月訖工，總其器爲數一十有八，析之爲二百三十五。蓋大成樂之式也。庫有祭器三百四十五事，歲久將就敝，侯悉取而新之，亦罔不殫厥心焉。烏虜侯於爲邦先務其大者得之矣。按周禮大司樂治建國之學政，合國之子弟使有道德者教之，死則以爲樂祖，祭於瞽宗，非其師弗祖也；非其祖弗祭也。後世學政既弛，教者不必其人，雖欲祭之，曷從而祖之？惟我先聖孔子道高如天，德厚如地，教化無窮如四時，民到於今賴之。故到於今祖之，然其大合樂也。達於大郡止焉。襄陽爲楚大郡，以其狀考之，春秋祭於廟者二

百四十而未嘗有樂也。侯於爪髮既剪之餘，注心於簿書期會之所不及，而其民信之，是可書也。已或曰古樂之亡久矣，宋明道先生欲著樂書而弗果，西山律呂未見於用，今之樂猶古之樂與？曰此非守臣之所能與也。今之論人也過嚴矣，始也予讓記而曹察院命之，垂二年復轉託於我方伯劉東山先生，予重違其意也。而與之侯名仲字廷章，沅之宜春人，相是役者同知某通判某推官某也。此文始屬稿於鄒汝愚，復略改次答曹察院，非我志也。覽者詳焉。

白沙子全集卷之一終

白沙子全集卷之二

論

論前輩言銖視軒冕，塵視金玉 三篇

上

道至大，天地亦至大，天地與道若可相侔矣。然以天地而視道，則道為天地之本，以道視天地，則天地者太倉之一粟，滄海之一勺耳。曾足與道侔哉！天地之大，不得與道侔，故至大者道而已。而君子得之一身之微，其所得者富貴貧賤，死生禍福，曾足以為君子所得乎？君子之所得者有如此，則天地之始，吾之始也。而吾之道無

白雲全集 卷之二  
所增天地之終吾之終也而吾之道無所損天地之大且不我逃而我不增損則舉天地間物既歸於我而不足增損於我矣天下之物盡在我而不足以增損我故卒然遇之而不驚無故失之而不介舜禹之有天下而不與烈風雷雨而弗迷尚何銖軒冕塵金玉之足言哉然非知之真存之實者與語此反惑惑則徒爲狂妄耳

中

天下事物雜然前陳事之非我所自出物之非我所素有卒然舉而加諸我不屑者視之初若與我不相涉則厭薄之心生矣然事必有所不能已物必有所不能無來於吾前矣得謂與我不相涉耶夫子謂不義而富且貴於我如浮雲謂薄不義也非薄富貴也孟子謂舜視棄天下如敝屣亦謂重愛親也非謂輕天下也君子一心萬理完具事物雖多莫非在我此身一到精神具隨得吾得而得之矣失吾得而失之耳厭薄之心何自而生哉巢父不能容一瓢嚴陵不能禮漢光此瓢此禮天下之理所不能無君子之心所不能已使二人之心果完具亦焉得而忽之也若曰物吾知其爲物耳事吾知其爲事耳勉焉舉吾之身以從之初若與我不相涉比之醫家謂之不仁昔人之言曰銖視軒冕塵視金玉是

心也。君子何自得之哉。然非其人與語此，反感惑則累之矣。或應曰：是非所謂君子之心也。君子之辨也。曰：然。然無君子之心，徒有輕重之辨，非道也。

下

或曰：道可狀乎？曰：不可。此理之妙，不容言。道至於可言，則已涉乎麤迹矣。何以知之？曰：以吾知之，吾或有得焉。心得而存之，口不可得而言之。此試言之，則已非吾所存矣。故凡有得而可言，皆不足以得言。曰：道不可以言狀，亦可以物乎？曰：不可。物囿於形，道通於物，有目者不得見也。何以言之？曰：天得之爲天，地得之爲地，人得之

爲人，狀之以天則遺地，狀之以地則遺人，物不足狀也。曰：道終不可狀與？曰：有其方則可舉一隅而括其三隅，狀道之方也。據一隅而反其三隅，按狀之術也。然狀道之方非難，按狀之術實難。人有不知彈，告之曰：彈之形如弓，而以竹爲弦，使其知弓則可按也，不知此道之大，告之曰：道大也，天小也，軒冕金玉又小，則能按而不惑者鮮矣。愚故曰：道不可狀，爲難其人也。

安土敦乎仁論

易上繫曰：安土敦乎仁，子曰：寓於此，樂於此，身於此，聚精會神於此，而不容惑忽，是謂之曰：君子安土敦乎仁。

也。此觀泰之序卦曰履而泰，然後安。又曰履得其所，則舒泰，泰則安矣。是泰而後可安也。夫泰通也，泰然後安者，通於此，然後安於此也。然九二曰包荒，用馮河，是何方泰而憂念即興也。九三曰艱貞，无咎，則君子於是時愈益恐恐然如禍之至矣。是則君子之安於其所，豈直泰然而無所事哉。蓋將兢兢業業，惟恐一息之或間，一念之或差，而不敢以自暇矣。有於予心，符或曰：君子不巳勞乎。應曰：乾之象曰天行健，天之循環不息者，健而已。君子執虛如執盈，入虛如有人，未嘗少懈者，剛而已。天豈勞哉。君子何爲不暇乎。

### 無後論

君子一心，足以開萬世；小人百惑，足以喪邦家。何者？心存與不存也。夫此心存則一，一則誠；不存則惑，惑則僞。所以開萬世、喪邦家者，不在多，誠僞之間而足耳。夫天地之大，萬物之富，何以爲之也？一誠所爲也。蓋有此誠，斯有此物；則有此物，必有此誠。則誠在人，何所具於一心耳。心之所有者，此誠而爲天地者，此誠也。天地之大，此誠且可爲，而君子存之，則何萬世之不足開哉。作俑之人，既惑而喪其誠矣。夫既無其誠，而何以有後耶。

### 仁術論

天道至無心。比其著於兩間者，千怪萬狀，不復有可及至巧矣。然皆一元之所爲。聖道至無意。比其形於功業者，神妙莫測，不復有可加。亦至巧矣。然皆一心之所致。心乎其此一元之所含乎。昔周公扶王室者也。桓文亦扶王室也。然周公身致太平，延被後世。桓文戰爭不息，禍藏於身者。桓文用意，周公用心也。是則至拙莫如意。而至巧者，莫踰於心矣。孟氏學聖人也。齊王不忍見一牛之死，不有孟氏，不知其巧也。蓋齊王之心，即聖人之心。聖人知是心之不可害，故設禮以預養之。以爲見其生而遂見其死，聞其聲而遂食其肉，則害是心莫甚焉。

故遠庖厨也。夫庖厨之禮，至重不可廢。此心之仁，至大不可戕。君子因是心制是禮，則二者兩全矣。巧莫過焉。齊王之心，一發契乎禮。齊王非熟乎禮也。心之巧同也。聖人誅民害而逆之，四裔之民奚罪焉。亦曰戮之則傷仁，存之遺害。故聖人之仁，有權焉。使之遠寓魑魅，則害去而惡亦不得施矣。夫人情之欲在於生，聖人即與之生。人情之惡在於死，聖人不與之死。惡衆人所惡也。聖人即逆除裔夷，惡難施也。聖人以投惡，聖人一舉而迭中。聖人未嘗巧也。此心之仁，自巧也。而聖人用之，故天下有意於巧者，皆不得廁其間矣。周公一金滕，大發寤。



時主以後世事觀至巧矣周公豈有意耶亦任心耳

論詩不易

宋歐陽文忠公最愛唐人遊寺詩曲徑通幽處禪房花木深又愛一人送別詩曉日都門道微涼草樹秋云修平生欲道此語道不得朱文公謂今人都不識此等好處是如何二公最知詩者也後人誠未易及如此兩聯予始因歐公歎賞之至欲求見其所以妙如歐公之意了不可得徧問諸朋友無知者徐取魏晉以下諸名家所作凡爲前輩點出者反覆玩味久之乃若麤有得焉間舉以告今之善言詩者亦但見其唯唯於吾所已言

者而已吾所不言者彼未必知也夫然後歎歐公之絕識去今之人遠甚而信文公之言不誣也噫詩可易言哉

說

菊逸說

草木之品在花桃花於春菊花於秋蓮花於夏梅花於冬四時之花臭色高下不齊其配於人也亦然潘岳似桃陶元亮似菊周元公似蓮林和靖似梅惟其似之是以尚之惟其尚之是以名之今之托於花者吾得一人焉吉水處士張某號菊逸蓋賢而隱者屈子曰淦秋菊之落英陶子曰秋菊有佳色浥露掇其英皆以菊爲悅者也皆古之賢人也菊之美不待贊菊花之美而隱者也某之托於菊也亦不待贊

白沙子全集 卷之二  
素馨說

草木之精氣下發於上爲英華率謂之花然水陸所產  
妍媸高下美惡不等蓋萬不齊焉而人於其中擇而愛  
之凡欲其有益於事非愛之而溺焉者也產於此邦曰  
素馨者香清而體白郁郁盈盈可掬可佩貫四時而不  
凋供一賞而有餘亦花之佳者也好事者致於予予既  
愛之遂益究其用取花之蓓蕾者與茗之佳者雜而貯  
之又於月露之下掇其最芬馥者置陶瓶中經宿而俟  
茗飲之入焉然則是花之用於人雖不若麻縷之與菽  
粟然益亦不爲無用也人之資於麻縷爲其可以溫也

資於菽粟爲其可以飽也得之則生弗得則死今是花  
也吾取焉姑以其能郁郁盈盈少裨於茗耳雖不汲汲  
可也不汲汲由用之可已也使是花之於人如麻縷之  
與菽粟然又安可已哉可已而已不可已而不已引而  
伸之觸類而長之於道其庶幾乎治國其庶幾乎

大頭蝦說

客問鄉譏不能儉以取貧者曰大頭蝦父兄憂子弟之  
奢靡而戒之亦曰大頭蝦何謂也予告之曰蝦有挺鬚  
瞪目首大於身集數百尾烹之而未能供一啜之羹者  
名曰大頭蝦甘美不足豐乎外餒乎中如人之不務實

白雲子全集 卷之二  
者然鄉人借是以明譏戒義取此歟言雖鄙俗明理甚  
當然予觀今之取貧者亦非一端或原於博塞或起於  
鬪訟或荒於沉湎或奪於異好與大頭蝦皆足以致貧  
然考其用心與其行事之善惡而科其罪之輕重大頭  
蝦宜從末減譏取貧者反舍彼摘此何耶恒人之情刑  
之則懼不近刑則忽博塞鬪訟禁在法典沉湎異好則  
人之性有嗜不嗜者不可一槩論也大頭蝦之患在於  
輕財而忘分才子弟類有之蓋其才高意廣耻居人下  
而雅不勝俗專事已勝則自畋獵馳騁賓客支酬輿馬  
服食之用侈爲美觀以取快於目前而不知窮之在是

也如是致貧亦十四五孔子所謂難乎有恒者是也以  
爲不近刑而忽之故譏其不能自反以進於禮義教誨  
之道也孳孳於貧富之消長錙銖較之而病其不能者  
曰大頭蝦此田野細民過於爲吝而以繩人之驕非大  
人之治人也夫人之生陰陽具焉陽有餘而陰不足有  
餘生驕不足生吝受氣之始偏則爲害有生之後習氣  
乘之驕益驕吝益吝驕固可罪吝亦可鄙驕與吝一也  
不驕不吝庶矣乎

禽獸說

人具七尺之軀除了此心此理便無可貴渾是一包膿

白沙子全集卷之二  
血裹一大塊骨頭饑能食渴能飲能著衣服能行淫慾  
貧賤而思富貴富貴而貪權勢忿而爭憂而悲窮則濫  
樂則淫凡百所爲一信氣血老死而後已則命之曰禽  
獸可也

題跋

跋清獻崔公題劔閣詞

弘治甲寅十月作

萬里雲間戍立馬劔門關亂山極目無際直北是長安  
人苦百年塗炭鬼哭三邊鋒鏑天道久應還手寫留屯  
奏炯炯寸心丹對青燈搔白髮漏聲殘老來勲業未就  
妨却一身閒梅嶺綠陰青子蒲澗清泉白石怪我舊盟  
寒烽火平安夜歸夢到家山右調水調歌頭吾鄉先輩  
荆坡先生宋丞相清獻崔公鎮蜀時題劔閣即此詞也  
曩夢拜公坐我於牀與語平生仕止久速偶及之仰視  
公顏色可親一步趨問不知其已翱翔於蓬萊道山之

上欲從之上下而無由因請公手書公欣然命具紙筆  
烏虜古今幽明一理人之所見則有同異感而通之其  
夢也耶其非夢也耶今書遺其後七世孫同壽云

書思德亭碑後

成化八年壬辰夏廣右陶公由吾邑長進秩僉憲六年  
考滿如京師將行也諸父兄相與攜思德碑文一首詣  
予請文以贈曰將以是考也諸父兄坐既定余撫碑歎  
曰嗟夫昔壬午之冬寇忽大至城下民被剽掠死者甚  
衆公方備寇於外報至哭徑歸及郊哭入城呼士卒慟  
哭撫之告以滅賊皆感激增氣捐軀赴難震動一邑此

吾與諸父兄所共見也賊益充斥公由是建子城與民  
固守又量地遠邇連爲營以塞四境要害設守備之法  
內外戒嚴賊不敢犯民到今賴之凡使吾兄弟妻子得  
免流離老稚謳歌田里與鄰壤異者公也公有識慮善  
揆度其所施爲事務實而不爲虛文故能取必於此經  
歷久遠民受其賜而公之功有成此吾與諸父兄所共  
知也公家廣右之鬱林去賊近吾邑在吾省之西南近  
省多饒資民賊利得之每歲入寇公過之賊不得逞退  
過公先塋衆賊將伐木取坯土以懼公賴忠烈之靈震  
怒在天賊尋畏不敢近嗚呼此公捨一家之危以易一

邑之安吾與諸父兄所共聞也夫是三者之難能公實能之以惠吾民吾民所以頌公之德在此一片石則或聞之而不言或言之而非專豈諸父兄與作碑者之意耶公爲縣久其有勞於吾民不可具書蓋公之治民如其治兵因應隨機初無定體其治兵也如文士作文竒生筆端無事蹈襲故能使人畏之而率以取勝此皆公精神心術之奧之運人不可得窺故尤不可得書可見者跡之顯者耳書其跡而民莫不信余是以冒言之以補碑之弗及若夫述職贈言以勉當道此僚友之分君子之任非吾與諸父兄之宜

書孔高州平賊詩卷後

王別駕所爲孔高州平賊十二詩并圖說予覽之歎曰嗟夫太守誠有功於民也太守今進秩憲副使其視民如傷必不偏於一隅安於一日以爲足吾意副使之賢勞謙而不伐雖有同時詠歌之美蓋未知其果樂聞之而首肯否雖然或亟稱之必深願望之亦君子所不能已於言也

書蓮塘書屋冊後

成化十九年春正月予訪予友莊定山於江浦提學南畿侍御上饒婁克讓來會予白馬菴三人相與論學賦

白沙子全集 卷之二  
詩浹辰而別侍御之兄克貞先生與予同事吳聘君子  
來京師見克貞之子進士性及其高第門人中書蔣世  
欽因與還往居無何侍御官滿來朝予卧病慶壽寺之  
數人者無日不在坐師友蟬聯臭味相似亦一時之勝  
會也侍御示予蓮塘書屋圖山雲水石竹樹陰翳恍然  
若蓮塘之在目藹然絃誦之聲盈耳也予玩而樂之謂  
侍御曰地由人勝不勝誰傳周茂叔濯纓於濂溪而世  
濂溪程叔子著書於龍門而世龍門朱晦翁講道於考  
亭而世考亭今婁氏居蓮塘宜世蓮塘使蓮塘之名有  
聞於天下後世者婁氏也使婁氏有聞於天下後世者

婁氏自爲之非蓮塘也蓮塘之遇不其幸歟濂溪以茂  
叔勝龍門以叔子勝考亭以晦翁勝蓮塘以婁氏勝古  
人今人無不同也抑不知婁氏之所修而執之者同於  
古人否歟惡乎同乎同其心不同其迹可也同其歸不  
同其入可也入者門也歸者其本也周誠而程敬考亭  
先致知先儒恒言也三者之學於聖人之道孰爲邇孰  
知之無遠邇歟周子太極圖說聖人定之以中正仁義  
而主靜問者曰聖可學歟曰可孰爲要曰一爲要一者  
無欲也遺書云不專一則不能直遂不翕聚則不能發  
散見靜坐而歎其善學曰性靜者可以爲學二程之得



於周子也。朱子不言有象山也。此子之狂言也。婁氏何居焉。予以景泰甲戌遊小陂。與克貞先後至。凡克貞之所修而執之者。予不能悉也。書予說於蓮塘圖。侍御質諸克貞先生。以爲何如。

書一之自罰帖後

此帖其實命之。而云自罰者。貫不自以爲過導之。使知悔也。貫之此舉。某初益以爲可卒歸於貫者。貫主之。托始於貫。謀事愆義。規畫無度。皆貫之失。不容於公議。故與士友共責之。而不得私焉。其不可自恕者。謹以書諸日錄矣。自罰必一年。而後復者。過之。小大爲限。復深責。

望之。昭仁示義。殆亦孔門鳴鼓之遺意。與子曰由也升堂矣。未入於室也。逮其晚年。進德極於高遠。未必非此門人之助。而由之名。光於後世矣。則貫其可侮哉。

書漫筆後

文章功業氣節。果皆自吾涵養中來。三者皆實學也。惟大本不立。徒以三者自名。所務者小。所喪者大。雖有聞於世。亦其才之過人耳。其志不足稱也。學者能辨乎此。使心常在內。到見理明後。自然成就得大。論語曰。朝聞道。夕死可矣。孔子豈欺我哉。

跋沈氏新藏考亭真蹟卷後

張宣公城南雜詠廿首考亭朱子爲和之楊鐵厓評其詩謂宣公有古風思緻於考亭惟曰朱子之辭不敢評其信然耶抑別有所指不欲盡發之耶昔之論詩者曰詩有別材非關書也詩有別趣非關理也又曰如羚羊挂角無迹可尋夫詩必如是然後可以言妙近代之詩遠宗唐近法宋非唐非宋名曰俗作後生溺於見聞不可告語安得鐵厓生並世予將叩之其亦有以復我耶鐵厓補書宣公詩與文公真蹟併藏沈氏都憲公書來俾予題予既未及見因附論鐵厓之後如此云

跋梁曉挽李唐詩

曉爲詩悼李唐唐卒未娶無顯然悔尤皆以爲幸然曉之於唐既送其往復迎其來何曉之不憚煩也造化固無是理矣但如曉說苟無聖人之德而有妻子之累雖曉不能以一日活世間况於唐乎曉之爲人謀亦踈矣曉乎其自處可也

跋張聲遠藏康齋真蹟後

先師康齋遺稿某藏之十二年矣出入必偕天順初先師膺聘入京途中紀行諸作皆當日手書寄白沙凡七紙成化己丑春三月行李出北京是日次於析木之店以示東吳張聲遠鏌一見驚絕閱之竟日不目瞬以手

撫弄以口吟哦某憐之割一紙是歲六月過清江以手  
 書問先師尚無恙也明年秋鏤書來求跋又二年壬辰  
 二月豐城友人始以訃來先師之卒在己丑十月至是  
 三易歲當鏤求跋語時屬纊來一年矣烏虜悲乎先師  
 道德名譽傾一世婦人小子知之華夏蠻貊咸知之平  
 生愛一字一辭不以假人某之所得徒以一日在門下  
 然誦其言想見其丰采而得其為人則宜其有惕然而  
 感勃然而興者矣某猶望此於百世之下况其邇者乎  
 後生可畏鏤其念諸門人某謹識

跋漳州功德碑後

漳州姓張名瓚字德潤別號兩山居士番禺人詡之父也

讀漳州功德絕句云罷守三州卧兩山漳州面目此碑  
 間郡人欲識蒙菴老也傍斯文提一班作碑者林蒙菴  
 曩於京師見其人慎許可人以是信之今直靠他作證  
 明師也蒙菴見拙詩想為抵掌但未知肯勒於碑陰否  
 也

書自題大塘書屋詩後

予既書婁克讓蓮塘書屋圖後蔣世欽繼之以大塘書  
 屋之請予賦五言近體一章既以答世欽世欽少之予  
 乃究言詩中之旨首言大塘書屋乃中書蔣世欽所建  
 頷聯言為學當求諸心必得所謂虛明靜一者為之主

徐取古人緊要文字讀之庶能有所契合不為影響依  
附以陷於徇外自欺之弊此心學法門也頸聯言大塘  
之景以學之所得易所謂復其見天地之心乎此理洞  
如然非涵養至極胸次澄徹則必不能有見於一動一  
靜之間縱百揣度祇益口耳所謂何思何慮同歸殊塗  
百慮一致亦必不能深信而自得也未聯借方士之丹  
以喻吾道之丹卒歸之龍門者明其傳出於程子而人  
未之知也拙見如此未知是否然予於世欽不可謂無  
意矣所病者辭采不足以動人耳世欽胡為而少之予  
以世欽厭夫為文字章句之學者勇於求道不耻下問  
於予予是以重言之謂予俯仰於時姑喋喋以塞夫人  
之意非予所以處世欽也

書鄭檢討所編劉閔札後

此吾翰林鄭先生廷綱取吾平日所得於其友劉閔子  
賢手書會而編之以為此卷子賢嘗以孝行聞於鄉之  
人今閱此卷意其天資可與共學而鄭先生不没人善  
也皆可敬中間一簡告鄭先生以處貧之難吾獨惜子  
賢之困於不足無所於謀也三旬九食亦昔人之常事  
必不得已而干人雖謀於鄭先生可也而徒告之難鄭  
先生豈難於濟人者哉觀者疑焉雖不以編入可也

白沙子全集卷之二  
書鄧政求濟帖後

於乎勢利爲市朋友道絕昔人所能者例不可望於俗輩政之號不足於予固其所矣惜予貧且賤無以副政之請此昔賢所謂旋渦底佛安能救落水羅漢不然予之所欲濟與所識求濟於予者多矣豈獨政哉雖然政於予無一日之雅奚以亮予之能惠予負政多矣十室之邑尚有忠信如夫子政其廣求之必得一士如予而無予之貧賤政其庶幾乎撫紙太息書其後歸之

書玉枕山詩話後

予又有迴龍寺夜坐詩云孤燭江邊寺踈鐘雨後天愁

人知永夜遠客惜流年不買南安酒留充玉枕錢牀風無意緒吹斷藥爐烟第三聯亦以玉枕而發東海乃不收入詩話中偶忘之耶東海平日自謂具隻眼能辨千古是非人物而近遺夫康齋又何也康齋易知耳予年二十七遊小陂聞其論學多舉古人成法由濂洛關閩以上達洙泗尊師道勇擔荷不屈不撓如立千仞之壁蓋一代之人豪也其出處大致不暇論然而世之知康齋者甚少如某輩往往譏呵太甚群喙交競是非混淆亦宜東海之未察也微吾與蘇君今日之論則東海之康齋其爲晏嬰之孔子乎了翁之伯淳也噫成化壬寅

白沙子全集 卷之二  
九月二十八日新會陳獻章在南安橫浦驛讀東海先生玉枕山詩話秉燭書此于蘇君卷中

書鄭巡檢詩卷後

吾邑沙岡巡檢鄭榮官滿告歸持此卷過白沙乞詩榮莆人也壯而仕老而休賢於不知止者予既贈之詩復錄近作七絕於此莆有大理黃先生故人也榮見問我以此卷呈之

題吳瑞卿采芳園記後

歲云暮矣冬雨淒淒牛僵馬危商旅不歸號寒啼饑窮民怨咨采芳何爲將以遺所思所思在遠道天寒日短

誰爲致之不如待時時維仲春陽道既亨萬物得時和風披披人情熙熙博采衆芳汎汎輕航駕言出游不泥一邦雲龍風虎其傳自古而德之所被人將化之如赴壑之水汨汨洋洋不亦深乎瑞卿天下未有不本於自然而徒以其智收顯名於當年精光射來世者也易曰天地變化草木蕃時也隨時屈信與道翱翔固吾儒事也吾志其行乎猗與休哉

題余別駕中流砥柱圖後

別駕余先生命予題中流砥柱圖予讀彭秋官序文雖非正說此圖而意已足末舉元貞事一段結裹尤警策

有力故予倣其意而切言之。蓋不言則已，言必欲其有益於別駕，非相啖以利者也。故不為諛辭，其辭曰：使君使民不厭真，使君為臣莫愛身。使君不以榮辱為屈信，死生為戚忻，而以嗜慾為伐性之斧斤，千秋萬歲難磨滅，乃見中流砥柱人。

次王半山韻詩跋

一日忽興動，和得半山詩一十八首。稿寄時矩收閱，作詩當雅健第一，忌俗與弱。予嘗愛看子美、后山等詩，蓋喜其雅健也。若論道理，隨人深淺，但須筆下發得精神，可一唱三歎，聞者便自鼓舞，方是到也。須將道理就自

已性情上發出，不可作議論說去。離了詩之本體，便是宋頭巾也。大槩如此中間句格聲律，更一一洗滌，平日習氣渙然一新。所謂濯去舊見，以來新意，作詩亦正用得着也。批判去，改定乞再錄來，見示為幸。稿中有工拙，請下一轉語，以觀識趣，高下可乎。

書和倫知縣詩後

屠沽可與共飲，而不飲。彭澤公田之釀，古之混於酒者如是。與獨醒者不相能，而同歸於正。雖同歸於正，而有難易焉。醒者抗志直遂，醉者韜光內映，謂醉難於醒，則可。今之飲者，吾見其易耳，非混於酒而飲者也。烏虜安

得見古醉鄉之逃以與之共飲哉

送張方伯詩跋

某嘗謂作詩非難斟酌下字輕重為難耳如此詩第五句清字既研於心又叅諸友左揆右度終不可易而非公九載之守不渝某亦豈敢孟浪蓋一字之下其難如此詩其易言哉

跋潘氏族譜後

潘氏自其始祖太一公以下至臨淮典教華為世凡三十有四故國子祭酒豫章胡公若思括始終為之序頗詳悉同時稱聞人曰建安之楊曰南郡之楊曰浙東之

王曰臨川之王曰錢曰高曰苗曰曹曰裴題之跋之八九見先後續續光不已譜既重三十五世孫明威玘伯振慮夫光於今者或息於後重自其身者或失之於其子孫序而傳之以延厥光以增茲重於無窮焉惟其人不惟其人惟其位之徇則不信於世世方來其奚賴於是謹齋戒擇日進譜於白沙乞予言為序後予既德弗類而文又不及世於君之愛我奚足尚雖然有可為君言者而奚敢不書夫惟君子以神之沒身焉其效至於通神明光上下存乎孝弟形於事君為良臨大節為忠感於人心措諸天下為事業存乎推延光於簡冊存乎



白沙子全集 卷之二  
名勉而行之存乎誠君受明天子命爲能臣技謀勇果  
固所長能不規規於是惟所存孝弟心益誠益推著而  
爲良爲忠爲事業爲簡冊勲名種種皆君有也若是斯  
譜也不光重與先世德美具載諸文此不贅

批答張廷實詩箋

首章似胡文定解春秋以義理穿鑿二章發揮得道理  
極致非所敢當然此心亦自不能已願與公共勉之三  
章仙術多門姑置勿論然興致高遠者非此無以托古  
有留意於參同契而爲詩則斥以盜竊四章箋得之余  
清老唱道歌云世間膏火煎熬可厭亦在其中五章要

看第二句與第四句相應親切六章醉以溷俗醒以行  
獨醒易於醉醉非深於易者不能也漢郭林宗晉陶淵  
明唐郭令公宋邵堯夫善醉矣夫七章其失與首章同  
黃涪翁大雅堂記似爲此箋發者正詩家大體所關處  
不可不理會大抵詩貴平易洞達自然含蓄不露不以  
用意裝綴藏形伏影如世間一種商度隱語使人不可  
模索爲工欲學古人詩先理會古人性情是如何有此  
性情方有此聲口只看程明道邵康節詩真天生溫厚  
和樂一種好性情也至如謝枋得雖氣節凌厲好說詩  
而不識大雅觀其註唐絕句諸詩事事比喻是少牽

強多少穿鑿也。詩固有比體，然專務爲之，則心已陷於一偏。將來未免此弊，不可不知。八章不知馬，其失在人不在馬。少知進退去就而已者，亦未以馬稱也。平湖之進，吾惜之。九章珠珮用鄭交甫事，十章箋得之。詩從後定本，統論好，非但拙作所能當，持以論詩可矣。槩觀所論，多只從意上求語句，聲調體格尚欠工夫。在若論詩家一齊要到莊定山，所以不可及者，用句用字用律極費工夫，初須做古，久而後成家也。今且選取唐宋名家詩數十來首，諷誦上下，效其體格音律，句句字字一毫不自滿，莫容易放過。若於此悟入，方有蹊徑可尋。

雜著

書韓莊二節婦事

烏虜二氏之生，其相去且千載。韓故相國休之孫女莊，雷郡庶人妻，貴賤雖殊，其死於義一也。心事如青天白日，皎乎其不可尚，辭氣如大冬嚴雪，凜乎其不可犯。是豈資學問之功哉？是豈嘗聞君子之道於人哉？亦發於其性之自然耳。今之誦言者，咸曰：餓死事極小，失節事極大。故臨利害，比二氏乃能之。學者固不能於此，然則從事於詩書，反無所益。彼之不學，乃能不壞其性，何耶？是必有所以然者。學止於誇多鬪靡，而不知其性爲何。

物變化氣質爲何事人欲日肆天理日消其不陷於禽  
獸者幾希矣予讀二氏之辭有感故錄而藏之

### 誠子弟

人家成立則難傾覆則易孟子曰君子創業垂統爲可  
繼也若夫成功則天也人家子弟才不才父兄教之可  
固必耶雖然有不可委之命在人宜自盡里中有以彈  
絲爲業者琴瑟雅樂也彼以之教人而獲利既可鄙矣  
傳於其子託琴而衣食由是琴益微而家益困展轉歲  
月幾不能生里人賤之耻與爲伍遂亡士夫之名此豈  
嘗爲元惡大憝而喪其家乎才不足也既無高爵厚業

以取重於時其所挾者率時所不售者也而又自賤焉  
奈之何其能立也大抵能立於一世必有取重於一世  
之術彼之所取者在我咸無之及不能立諉曰命也果  
不在我乎人家子弟不才者多才者少此昔人所以歎  
成立之難也汝曹勉之

### 示學者帖

諸君或聞外人執異論非毀之言請勿相聞若事不得  
已言之亦須隱其姓名可也人氣稟習尚不同好惡亦  
隨而異是其是非其非使其見得是處決不至以是爲  
非而毀他人此得失恒在毀人者之身而不在所毀之

白沙子全集卷之二  
人言之何益且安知己之所執以爲是者非出於氣稟  
習尚之偏亦如彼之所執以議我者乎苟未能如顏子  
之無我未免是已而非人則其失均矣况自古不能無  
毀盛德者猶不免焉今區區以不完之行而冒過情之  
譽毀固其所也此宜篤於自修以求無毀之實不必以  
爲異而欲聞之也昔呂蒙正拜副相一朝士指之曰此  
子亦參政乎同列欲詢其名遽止之曰知當終身不忘  
不如勿聞賢者所存固異於人也諸君亦宜念之

手帖

讀一之自罰帖所謂喜三代之餼羊猶存也此舉雖過  
然究其爲心蓋亦可憫且自罰之辭甚實其進固未可  
涯也若夫久居師席不能致門人於無過舉之地此則  
老夫之罪請附此於日錄算一過諸君其誌之

喻塾中帖

不邀人敬不受人慢某今日方曉待深之之道大抵情  
不可過會不可數抑情以止慢踈會以增敬終身守此  
然後故舊可保請自今後朔望免禮諸生在塾中者亦  
不勞進揖容珪持自紙往喻俾悉知余意

與容珪帖

絢等雖在門牆其與拙者之意實未相接徒以名分相

白沙子全集 卷之二  
繫爲美談耳。雖然賢於吠雪者多矣。廣收而勿拒。小警而大遺。其諸全交與待衰俗之意乎。

漫筆示李世卿湛民澤 湛若水初名雨字民澤

昨夕樓上聞雨聲澎湃。睡不能著枕。因檢會鄉里平時還往人。十七七八中間年及七十者才一二。餘皆六十而下。四十蚤晚死者恒多。嗚呼。人所得光陰能幾生。不知愛惜。漫浪虛擲。卒之與物無異。造物所賦於人。豈徒具形體喘息天地間。與蟲蟻並活而已耶。浮屠氏雖異學。亦必以到彼岸爲標準。學者以聖人爲師。其道何如。彼文章功業氣節。世未嘗乏。人在人。立志大小。歲月固

不待人也。

偶書遺湛民澤龔曰高遊羅浮者

仙人譚景升詩云蓬萊料想無多路。只在譚生拄杖前。羅浮海上山。葛仙治之。真蓬萊哉。方竹君入手振之。鏗然有聲。上撐天下拄地。四方惟意所如。諸君即日東遊。度鐵橋。登飛雲。坐黃龍。嘯明月。是真神仙矣。譚生豈欺我哉。久矣吾夢長髯翁。遺予羅浮山。盡四百三十二峰。一囊括之。開半面以待遊筇之入。

書法

予書每於動上求靜。放而不放。留而不留。此吾所以妙

乎動也得志弗驚厄而不憂此吾所以保乎靜也法而不囿肆而不流拙而愈巧剛而能柔形立而勢奔焉意足而竒溢焉以正吾心以陶吾情以調吾性此吾所以游於藝也

速勾丁知縣廟疏

立一祠既以表茂宰之賢又以見吾鄉尚德慕義一唱百和視死如生又孰不咨嗟而歎羨其美耶且報往可以勸來此祠立後必有隍義而起者問所由來鄉諸父兄子弟不忘舊令之德章與有榮矣幸甚幸甚即辰春日布和工匠畢集其告諸義士及是時慨然念此舉之

不易發誠心而共濟幸無辭曰姑俟來日區區不勝至禱

戒懶文示諸生

大舜爲善鷄鳴起周公一飯凡三止仲尼不寢終夜思聖賢事業勤而已昔聞鑿壁有匡衡又聞車胤能囊螢韓愈焚膏孫映雪未聞懶者留其名爾懶豈自知待我詳言之官懶吏曹欺將懶士卒離母懶兒號寒夫懶妻啼饑猫懶鼠不走犬懶盜不疑細看萬事乾坤內祇有懶字最爲害諸弟子聽訓誨日就月將莫懈怠舉筆從頭寫一篇貼向座右爲警戒

賦

湖山雅趣賦

丙戌之秋余策杖自南海循庾關而北涉彭蠡過匡廬  
之下復取道蕭山沂桐江艤舟望天台峰入杭觀於西  
湖所過之地盼高山之漠漠涉驚波之漫漫放浪形骸  
之外俯仰宇宙之間當其境與心融時與意會悠然而  
適泰然而安物我於是乎兩忘死生焉得而相干亦一  
時之壯遊也迨夫足涉橋門臂交羣彥撤百氏之藩籬  
啓六經之關鍵于焉優游于焉收歛靈臺洞虛一塵不  
染浮華盡剝真實乃見鼓瑟鳴琴一回一點氣蘊春風

之和心游大古之面其自得之樂亦無涯也出而觀乎  
通達浮埃之濛濛游氣之冥冥俗物之茫茫人心之膠  
膠曾不足以獻其一哂而况於權爐大熾勢波滔天賓  
客慶集車馬駢填得志者揚揚驕人於白日失志者戚  
戚伺夜而乞憐若此者吾哀其爲人也嗟夫富貴非樂  
湖山爲樂湖山雖樂孰若自得者之無愧怍哉客有張  
璪者聞余言拂衣而起擊節而歌曰屈伸榮辱自去來  
外物於我何有哉爭如一笑解其縛脫屣人間有真樂  
余欲止而告之竟去不復還噫斯人也天隨子之徒與  
振衣千仞岡濯足萬里流微斯人誰將與儔

止遷蕭節婦墓賦

昔兵戈之攘兇盜兮孰俵俵而握之符號令紛其不一  
兮汨珠玉于泥塗抹之亂之執兵之狗而慾兮胡寧知  
耻而畏誅若美人兮宗廟之瑚母我即帶兮母我捫袪  
母我執手兮手可斷而不可汚奮犬豕之罵以冒刃兮  
貌凜凜其若蘇死則快兮生安用諸嗟此烈婦兮彼丈  
夫弗如丁侯爲縣兮德教用敷表貞塚兮營祭畚行路  
嗟歎兮揭聲教於海隅蠢茲弗畏兮託日者以爲誣欲  
改封以自便兮動有識之長吁匪今侯之繼軌兮隨四  
尺其奚辜我將告外史兮筆之于書

贊

忍字贊

七情之發惟怒爲遽衆逆之加惟忍爲是絕情實難處  
逆非易當怒火炎以忍水制忍之又忍愈忍愈勵過一  
百忍爲張公藝不亂大謀其乃有濟如其不忍傾敗立  
至

銘

世賴堂銘

恭惟我祖渭川府君所立殊衆七十八年漢陰抱甕自  
是以來我家用開堂以世名德音孔恢



家廟鐘銘

其質重其聲遲其動靜有時永以為神之依

丁氏祠堂鐘銘 代丁知縣作

出佛山冶入濟陽堂厥聲鏗鏘震於無疆

改鑄邑譙樓鐘銘

費而不傷壞則有成同百里之聲存萬世之經作民不

信視此鐘銘 鐘始造模而丁侯卒惜侯之志不及成此銘亡後有繼之者何以考故錄之

啓

聘啓 成化辛卯二月代兄作

伏以持鈍舌者必淡顏良易投於正士工巧言者宜令

色每見悅於常流蓋夙分之雅同豈強能而苟比茲者

幸遇尊親家鄭處士閎閱偉而着眼高不鄙小弱弟某

秀才章句踈而用心苦是故聲氣之相感庶幾物我之

相忘雖首院以難諧必東牀而獲選鄭高楊郭幸拔貴

邑之甲科馬聶鍾容徒竊敝鄉之商品適侔四姓敢贊

一言此不往而彼不來陰則升而陽則降慙魚緘之莫

罄念雁幣之宜將浩矣滄溟寧却一蹄涔之水魏哉太

華何辭五弓許之陵乞箋起居用慰注仰謹奉啟不宣

又成化辛卯十二月作

文啟伏以德陋卷顏一瓢趣味儘殊於俗尚著清門羅三字品題蓋屬於鄉評惟此翁之可人宜吾弟之有室始者曠十年而莫遇訪尋顧屑屑於執中茲焉比兩姓以克諧期待乃惓惓于舉案正將求閨門之助必無忝伉儷之名至誠既合於天人素志何疑於夢卜片言賜允束帛宜先懷素履而仰高山躋攀絕矣接清絃以奏流水風韻悠哉奉啟不宣

請期啟

成化辛卯十二月代兄作

文啟伏以鸞膠續好庶幾無擇於高明雁幣將誠益已不嫌於菲薄遂入芝蘭之室况逢桃李之晨須傳采牘以求通當載墨車而攝盛斯文未喪故事宜遵絕言資送之有無盡屬去來之感應遲佳期之甚邇庶獲瞻依承至貺之匪嘉奚勝悚懼謹奉啟不宣

與李宗

成化壬辰正月代兄作

文啟猥蒙不鄙弱弟某遂茲室家之願實吾子之惠幸甚幸甚某以序次當為主人不得詣吾子躬專請也倘吾子不憚劬於路而以歸羅氏子於白沙某也則願吾子之終賜愛焉

白沙子全集卷之二終

Table with multiple columns of text, likely bleed-through from the reverse side of the page. The text is mostly illegible due to fading and bleed-through.

211
7
2

